

Jezu - Apalaí

Maku Zurutopõpyry sero Jezu poko

Sero pape tymerose João Maku a. Toerohse ynororo omi kurā ekarory poko Jezu poko. Tyekyry maro toytose ynororo Panape maro tuhke pata tō poro, imehnō amorepase Jezu poko. Peturu maro tātamorepase ynororo. Naeroro Peturu namorepahpyry tymerose eya pape pokona Jezu nyrihpyry poko.

Sero pape ao kuamorepatorỹko mana Ritonõpo mükurume nymyry Jezu exiry poko. Jamihme kuhse Jezu mana kuakorehmarykō poko,ãko mana.

João ahno ĕpurihkane nurutopõpyry

(Mat 3.1-12; Ruk 3.1-18; Jo 1.19-28)

1

1 Sero nase omi kurano Jezu Kyrixtu Ritonõpo mükuru poko. 2 Apitoryme ynara tymerose Izaja a Ritonõpo omi poe,

“ ‘Eneko ke ynarpohpyry,’ ãko Ritonõpo mana.

‘Ytoko mã osemazuhme, oesemary kurākase.’

3 Opore oturũko mana ona po.

Ynara ãko ynororo mana,

‘Kuesẽkõ esemary tyritoko.

Esemary esemahtotoko sorohme,’ ãko mana,”

katoñ tymerose Izaja a pake.

4 Morarame mokyro João toeporehkase ona pona ahno esaka pyra, ahno ĕpurihkaneme. Mame ynara tykase ynororo,

—Ise awahtao xine oĕpurihkatorỹko ase, Ritonõpo a okurãkatohkõme, oorypyrykõ korokatohme.

Yrome oĕpurihkarykõ se pyra ase oorypyrykõ rumekary se pyra awahtao xine, tykase ynororo. 5

Morarame emero toytose toto eya, mokã Juteapõkomo, Jerusarĕpõkomo emero. Mame tōpurihkase toto eya Joatão kuaka.

—Popyra ase. Iiryryyme ase, tykase toto tyrypyrykõ tokarose irumekatoñme. Morara exiryke tōpurihkase toto João a. 6 Mame João zupony okyno hpoty risẽ kynexine kameru hpoty. Imety earyme roropa kynexine okyno pihpyry. Wexixi rokẽ zohme, ano zeni roropa aukurume kynexine. 7 Mame ynara tykase João,

—Okomino imepỹ oehnõko mana. Orẽpyra mokyro mana. Imehxo mokyro mana. Ihxitapãnõko ase eponaro toehse jahtao, isãtajã poko jahtao roropa. 8 Amarakõ tōpurihkase ya nakuaka repe, yrome mokyro Ritonõpo zuzenu ekarõko mana oya xine, tykase ynororo.

Jezu ĕpurihkatopõpyry

(Mat 3.13-17; Ruk 3.21-22; 4.1-13)

9 Morarame Jezu tooehse Nazare poe, Karirea poe. Karirea pata tamuru kynexine. Mame Jezu tōpurihkase João a Joatão kuaka. 10 Towõse ropa ahtao tuna ehpiokoxi, kapu tonese eya xine toepiakase. Mame Ritonõpo zuzenu tyhtose utukuimo panono. Jezu zuhpokoxi typorohse. 11 Morarame Ritonõpo omiry totase eya xine kaino,

—Umūkuru nymyry mase, osehxo ywy rahkene. Yzamaro mase, tykase kaino omi inetarykōme.

Jezu kuhtopōpyry joroko tamuru a

(Mat 4.1-11; Ruk 4.1-13)

12 Morarame tarose Jezu ahno esaka pyra Ritonōpo zuzenu a. 13 Moero tuhke tōmehse ynororo 40me. Mame joroko tamuru tooehse eya. Jezu riry se iirypyryme kynexine repe. Yrome kure rokē kynexine ynororo. Onokyro esao rokē kynexine moroto.
Morarame Ritonōpo nenyohytā tooehse kapu ae. Jezu takorehmase eya xine rahkene.

Imehnō amorepapatopōpyry Jezu a Karirea po

(Mat 4.12-22; Ruk 4.14-15; 5.1-11)

14 Morarame āpuruhpyry taka João tōmapose ahtao Erote a, Jezu toytose ropa Karirea pona. Ritonōpo omiry poko imehnō amorepase toytose ynororo.
15 —Ritonōpo emero se typoetoryme. Seromaroro ah oesēkōme nexino. Oorypyrykō irumekatoko. Aomipona ehtoko, tykase ynororo morotōkomo a.
16 Morarame toytoryhtao Karirea ikuhpo ehpikuroko Ximāo Peturu enene Jezu, zakorō maro, Ātare maro. Tarāpa emāko toh kynexine nakuaka, kana anŷnōko, kana anŷnanōme toexirykōke.
17 —Kana anŷnōko matou? Ehmaropa ymaro. Āmorepatorŷko ase imehnō amorepatohme oya xine jenetupuhtohme eya xine, tykase ynororo eya xine.
18 Mame axī tarāpa tynomose eya xine Jezu maro toytotohkōme. Jezu tokahmase eya xine rahkene.
19 Morarame moino pitiko Zepeteu mūkuru enene, Tiaku, João, enara. Kanawao toh kynexine. 20 Tarāpa tuīpokary poko toh kynexine. Mame toto eahmane. Mame tumykō tynomose eya xine. Zepeteu tynomose kanawao, ipoetory tō maro. Jezu maro toytose toto.

Jorokohpe aexihpyry poko

(Ruk 4.31-37)

21 Morarame Kapanāū pona toytose toto. Mame juteu tō oserematohae toto oturutoh taka Jezu tomōse mokaro amorepatohme tyya. 22 Mame tōsenuruhkase toto Jezu omiry etaryke tyya xine.
—To! Orēpyra amorepato mose nase. Moeze omihpyry poko amorepatōkō sā pyra nase. Orēpyra nase, tykase toto. 23 Morarame jorokohpā tooehse morotona. Toto atamorepatoh taka tomōse ynororo. Ynara tykase ynororo opore,
24 —Oty se hma Jezu, Nazarepohno? Yna enahkapory se hmahno? Awaro ase. Ritonōpo mūkurume oexiry waro ase. Inenehpohpyry kurāme mase, tykase jorokohpā Jezu a opore.
25 Mame joroko tyenonohse eya,
—Mynyhme exiko. Otūtako ropa mokyro ae. Jūme irumekako ropa, tykase Jezu eya.
26 Morarame jorokohpā tōsētorimase. Kui tykase ynororo opore. Morarame tutūtase ropa joroko mokyro ae. 27 Mame tōsenuruhkase morotaōkō emero.
—Enēko matose tyoro inamorepatary. Orēpyra mana. Joroko tō tūtanohpory ropa waro roropa ynororo, tykase toto oxime rokene.
28 Morarame Jezu tokātose moerōkomo a Karireapōkomo a.

Peturu merenoty kurākatopōpyry ropa poko Jezu a

(Mat 8.14-15; Ruk 4.38-39)

29 Morarame juteu tō atamorepatoh tae tutūtase ropa ynororo. Mame Ximāo Ātare maro tytapykō taka toytose toto, Tiaku, João, Jezu, enara. 30 Mame Ximāo merenoty kure pyra kynexine oxirohnōko. Tohrame kynexine. Jezu turuse eya xine,
—Kure pyra mose mana, tykase toto eya. 31 Morarame kurākara anŷne ropa tomary ke. Axī

tōxirohkehse ropa ynororo. Towōse ropa ynororo. Mame tautuhmase toto mokyro a, kuranōpokara a.

Kurākōkara kurākatopōpyry ropa Jezu a

(Mat 8.16-17; Ruk 4.40-41)

32 Mame kokonie pukuro kurākōkara tarose imehnomo a tuhke Jezu a, toto kurākatohme ropa. Jorokohpākō roropa tarose eya xine. 33 Kapanaūpōkō roropa tooehse tuhke imoihme. Tapyi eutary pota taka tōximōse toto. 34 Mame kurākōkara tukurākase ropa eya, tuhke. Joroko tō tutūtanohpose roropa eya mokaro ae. Joroko a sekerekamexipopyra kynexine ynororo, “Awaro ynanase,” karyke eya xine.

Karirea po Jezu ehtopōpyry

(Ruk 4.42-44)

35 Morarame kuratiri etaryhtao towōse ropa Jezu. Tokare pyra toytose ynororo ahno esaka pyra oturuse Ritonōpo maro. 36 Mame okomino Ximāo a tokahmase tymarōkō maro. 37 Mame Jezu tonese ropa tyaa xine ahtao ynara tykase toto eya,
—Emero oupīko toh mana, tykase toto eya.
38 Morarame ynara tykase Jezu eya xine,
—Ehmaropa tyorō pata pona, morotōkō amorepase Ritonōpo omiry poko. Moro poko oepyase, tykase Jezu.
39 Morarame kŷkŷtone Karirea poro Ritonōpo omiry ekarory poko juteu tō atamorepatohtonō takuroko. Joroko tō tutūtanohpose roropa ahno ae eya.

Ipū imotahpyry kurākatopōpyry Jezu a

(Mat 8.1-4; Ruk 5.12-16)

40 Morarame tupū motaryke toytose imepyry Jezu a toetuarimaryke. Tosekumuru po typorohse ynororo Jezu ēpataka.
—Ajohpāme sā ynara āko ase oya, kukurākako ropa ukurākary se awahtao. Imepŷ tukurākase oya exiryke oya tuaro oehno, tykase ynororo Jezu a.
41 Mame nupunato mokyro eneryke tyaa tapose tomary ke.
42 —Ŷ, okurākāko ropa ase, tykase Jezu eya. Axī ipū totyhse ropa. Kure ropa toehse ynororo. 43 Morarame ynara tykase Jezu tunukurākahpyry a,
44 —Osekātopyry ke exiko. Topohme rokē ytoko Ritonōpo maro oturukety a. Osenepota eya. Moeze nekaropohpyry ekarota eya, kure rokē oehtohme, imehnō tuarōtatohme roropa okurākatopōpyry ropa poko, tykase ynororo eya repe.
45 Yrome toytory ropahtao tokātose eya itamurume. Emero tōsekātose rahkene. Morara exiryke Jezu tokare tyoytosaromepyra toehse pata tō pona. Ahno esao pyra rokē ynororo ehse. Mame patapōkō tuhke toytose eya.

Pakaihkapŷ kurākatopōpyry ropa Jezu a

(Mat 9.1-8; Ruk 5.17-26)

2

1 Morotoino toytose ropa Jezu Kapanaū pona. Mame imehnō tōturuse ipoko. Ynara tykase toto,
—Tooehse ropa Jezu mana tytapyī taka, tykase toto ipoko. 2 Mame morotona tooehse toto imoihme. Tapyi typehkase eya xine. Tapyi eutary pota tao tōximōse toto. Morarame tamorepase toto Jezu a Ritonōpo omiry poko. 3 Morarame pakaihkapŷ tonehse imehnomo a Jezu a ikurākatohme ropa. Asakoropane kynexine enehnanomo. 4 Yrome omōsaromepyra toh kynexine ahno tuhke exiryke.

Morarama tapyi mypatarānaka tōnuhse toto. Tapyi tytiapose eya xine Jezu etonie. Mame kurākara tonyhtose eya xine moro ae etueh maro Jezu myhtokoxi.

5 —Kurākatō mokyro, tykase toto tukurohtao xine. Mame toto kurohtao tonetuputyry waro Jezu kynexine. Mame ynara tykase ynororo kurākara a,

—Aimo, oorypyry korokāko ase, tykase ynororo eya.

6 Moroto Moeze nymerohpyry poko amorepatōkō kynexine, typorohse. Tohne toehse toto Jezu omiry etaryke tyya xine.

7 —To! Morara kary popyra mana. Ritonōpo poenohōko rokē mose mana. Ritonōpo rokē popy rypyry korokary waro mana, tykase toto. Jezu kerekeremāko toh kynexine tukurohtao xine.

8 Yrome Jezu tuaro kynexine. Tykerekeremary tonetupuhse eya.

—Oty katoh ykerekeremāko matou okurohtao xihne? tykase ynororo eya xine. —Ywy ase Kapu ae Ayhtohpyry. 9 Iirypyrymākō rypyry korokary waro ase. Kurākōkara kurākary waro roropa ase. 10 Naeroro mose kurākāko ropa ase, iirypyrymākō rypyry korokary waro jexiry waro oehtohkōme, tykase ynororo eya xine.

Mame ynara tykase pakaihkapyny a ynororo,

11 —Tukurākase ropa mase. Owōko ropa. Oetueh aroko ropa atapyi taka, tykase ynororo eya.

12 Mame kuranōpokara towōse ropa totueh tapoe. Totueh tarose ropa eya. Mame tutūtase ropa ynororo tapyi tae imoihmākō neneryme. Mame tōsenuruhkase toto.

—To! tykase toto. —Kure Ritonōpo imehtiko. Mosero panō onenepitopyra sytatose, tykase toto.

Rewi eahmatopōpyry Jezu a tymaro aytotohme

(Mat 9.9-13; Ruk 5.27-32)

13 Morarama tutūtase ropa Jezu. Ikuhpo ehpikoxi toytose ynororo. Moroto ahno imoihme Jezu zomye toehse toto. Mame tamorepase toto eya. 14 Morarama mōpozakoxi toytose tahtao Rewi tonese eya, Aupeu mūkuru. Kohrame ynororo kynexine kowenu tinerū apoitoh tao.

—Ymaro eropa, ypoetoryme, tykase Jezu eya.

Mame toytose ynororo imaro. 15 Morarama Rewi tapyi taka toytose Jezu. Typorohse ynororo meza myhtokoxi. Tuhke kowenu tinerū apoinanō moroto kynexine. Mokaro maro, Jezu typorohse. Ipoetory tō roropa imaro typorohse. Iirypyrymākō roropa moroto kynexine tuhke. 16 Morarama moroto Moeze nymerohpyry poko amorepatōkō kynexine, parixeu tō maro. Jezu otukuru tonese toto a iirypyrymākō maro, kowenu tinerū apoinanō maro. Ynara tykase toto Jezu poetory tomo a,

—Oty katoh oesēkō otuhnōko hnae kowenu tinerū apoinanō maro iirypyrymākō maro? tykase toto tōturupose.

17 Morarama toto omiry totase Jezu a. Ynara tykase ynororo eya xine,

—Kurākō topinopyry se pyra mā toto, kure toexirykōke. Kurākōkara rokē topinopyrykō se mā toto.

Morararo kurākō kurākase pyra oepyase. Iirypyrymākō rokē kurākase oepyase, Ritonōpo omipona toto ehtohme, tykase Jezu eya xine.

Amotyryae rokē otuhtoh poko

(Mat 9.14-17; Ruk 5.33-39)

18 Morarama João poetory tō amotyryae rokē otuhse toto Ritonōpo maro tōtururukōke. Parixeu tō roropa amotyryae roropa otuhse toto juteu tamuru omipona toehtohkōme. Morarama imehnō toytose Jezu a oturupose. Ynara tykase toto eya,

—João poetory tō amotyryae rokē otuhnōko. Parixeu poetory tō roropa otuhnōko amotyryae rokene.

Oty kahtohme hkoh opoetory tō rokē tuenikaroro otuhnōko nae kokoro rokene? tykase toto, tōturupose Jezu a.

19 Mame ynara tykase Jezu eya xine,

—Toipe tosēkō maro toexirykōke, ymaro toexirykōke tuenikaroro rokē otuhnōko nase toto. 20 Imeīpo mā emynymāko mā toto tymaro xine pyra toehse jahtao. Morara ahtao rokē amotyryae rokē otuhnōko mā toto toemynymarykōke, tykase Jezu eya xine.

21 —Upo pakato toexihkase ahtao, kamisa kasenato ke pyra, ipanō ke rokē ixixinōko ropa sytatose. Kamisa kasenato ke typitahmase ahtao exihkāko ropa mana itamurumehxo. (Naeroro atamurukō omihpyry maro jomiry onoximara ehtoko. Atae pyra mā jomiry atamurukō omihpyry maro.) 22 Morararo eukuru ěme okyno pihpyry tyrise ahtao. Mame eukuru tyrisenā onyripyra sytatose pakato ětypyry aka. Tyrise eukuru kasenato zaka ahtao ehmōko mana pakatome exiryke. Mame eukuru ekuānōko mana atahnikāko. Eukuru ě roropa atahnikāko. Māpyra eukuru ě tyrisenā aka eukuru tyrisenā tyrise ahtao atahnikara mana asakororo eukuru, eny, enara. (Moro sã ynekarohpyry ěme matose tyrisenā sã toehse awahtao xine,) tykase Jezu eya xine.

Oserematoh esēme Jezu ehtoh poko

(Mat 12.1-8; Ruk 6.1-5)

23 Morarame oserematohae Jezu toytose tupito rānakuroko, typoetory tō maro. Tiriiku rānaka toytorykohtao ipoetory tomo a tiriiku tytahkase omise toexirykōke. Toipe juteu tō pake.

“Ematonanohnōko mase,” kara toto imepỹ tupi po tonahsē apoiryhtao omise exikety a enahtohme. 24 Moro eneryke tyya xine ynara tykase parixeu tō Jezu a,

—Eneko ke! Oty katohmehko moxiã tiriiku poko erohnōko nae? Popyra mana. Pake Ritonōpo omi poe ynara tymerose Moeze a pape pokona, “Erohpyra ehtoko oserematohae,” me tymerose pake, tykase parixeu tomo.

25 Morarame Jezu a tozuhse toto. Ynara tykase ynororo,

—Pape imerohpyry onenepitopyra hmatou Tawi ehtopōpyry poko, typoetory tō maro omise toto ahtao?

26 Ritonōpo maro oturutoh taka tomōse ynororo typoetory tō maro Ritonōpo zuru pokona. Apiata moro tapyi eraseme kynexine. Ritonōpo nukurākaphpyry rokē kynexine, tymaro oturuketō zurume. Moro tohse Tawi a omise toexiryke. Tawi Ritonōpo maro oturuketō maro pyra kynexine repe. Yrome moro wyi tohse eya. Tymarōkō tupase roropa eya. (Mame moro wyi enahxīpo Tawi tomo a, “Popyra matose,” kara Ritonōpo kynexine eya xine. Morara ahtao oty katoh ypoetory tō hxirōko matou?) 27 Mame ynara tykase Jezu parixeu tomo a,

—Oserematoh tyrise Ritonōpo a kuoserematohkōme. Yrome sero nonopōkō tyrise eya oserematohme rokē pyra. 28 Ywy ase oserematoh esēme, oserematoh rihpōme jexiryke, Kapu ae Ayhtohpyryme jexiryke, tykase Jezu eya xine.

Aosemahmirihmahpyry kurākatopōpyry ropa poko

(Mat 12.9-14; Ruk 6.6-11)

3

1 Morotoino juteu tō atamorepatoh taka Jezu toytose ropa. Moroto aosemahmirihmahpyry kynexine. 2 Morarame parixeu tō Jezu enēko toh kynexine aehxirotohme repe.

—Otarāme kurākara kurākāko ropa mana oserematohae, tykase toto. 3 Mame Jezu tōturuse aosemahmirihmahpyry a. Ynara tykase ynororo eya,

4 —Aimo, osehko irānaka, tykase eya. Mame tonenanomo a ynara tykase ynororo,

—Oty kurehxo oya xine oserematohae nae? Kure ehtopo? Popyra ehtopo? Oty oya xine kurehxo oserematohae nae? Kurākara kurākatoh ropa? Imepỹ etapatopo? Oty pake tyripose oserematohae Moeze a Ritonōpo omi poe? tykase Jezu, tōturupose eya xine.

Yrome onezuhpyra toh kynexine. 5 Mame tākye pyra Jezu tōsenuhmase. Tomyēkō tonese eya. Tohne roropa kynexine toehse otato pyra toto exiryke. Mame kurākara a ynara tykase ynororo,

—Oemary anŷko, tykase eya ynororo. Mame tãtaporamase ynororo. Emary osepane toehse ropa. 6 Morarame parixeu tã tutũtase ropa moro tae. Morarame tãximãse toto, Erote epe tã maro, Jezu poko tãturutohkãme, Jezu etapary se toexirykãke.

Imoihmãkã poko ikuhpo ehpio

7 Morotoino toytose ropa Jezu typoetory tã maro ikuhpo pona, Karirea pona. Mame tokahmase ynororo imoihmãkomo a Karireapãkomo a, Juteapãkomo a, 8 Jerusarãpãkomo a, Itumeapãkomo a, Joatão moinãkomo a, Tiropãkomo a, Xitãpãkomo a, enara. Tokahmase ynororo imoihmãkomo a. 9 Inukurãkatary enery se toexirykãke toytose toto, tuhke tukurãkase kurãkãkara eya exiryke. 10 Morara exiryke epuepurohmãko toh kynexine kurãkãkara Jezu apotohme tyya xine. Mame kanawa tohpikã tonehpose typoetory tomo a tãtyritohme, tykorãmaryino imoihmãkomo a. 11 Morarame jorokohpãkã Jezu eneryhtao, toepukase toto ãpataka,

—Ritonãpo mũkuru nymyry mase, tykase toto. Kui tykase roropa toto.

12 Mame turuse toto Jezu a.

—Jekaropyra ehtoko, tykase ynororo eya xine.

Orutua kã menekatopãpyry Jezu a 12me tymaro toto ytotohme

(Mat 10.1-4; Ruk 6.12-16)

13 Morarame toytose ynororo ppy pona. Tãpenery tã rokã tarose eya. 14 Moroto tymenekase toto eya 12me tymaro toto ytotohme.

—Amarokã tymenekase ya ymaro oytotohkãme, tykase ynororo eya xine. —Ynenyokyryme roropa matose exãko Ritonãpo omiry ekarotohme imehno a. 15 Yjमितunuru ekarãko ase oya xine joroko tã tãtanohpotohme oya xine imehnã ae, tykase ynororo eya xine.

16 Ynara toh kynexine, Ximão. Mokyro tosehphase ropa Peturume Jezu a. 17 Zepeteu poenã kynexine. Tiaku, João, enara toh kynexine. Konomerume tosehphase roropa toto Jezu a. 18 Imehnã roropa moroto kynexine, Ætare, Firipe, Patoromeu, Mateu, Tome, Tiaku. Aupeu mũkuru kynexine ynororo, Tateu maro, imepã Ximão roropa. Juteu tã esary pynoto kynexine ynororo te, 19 Juta Ixikariote. Tosã ewokahpã ynoro kynexine. Enara tymenekase toh kynexine Jezu a typoetoryme.

Peuzepu poko

(Mat 12.22-32; Ruk 11.14-23; 12.10)

20 Morarame Jezu toytose ropa ahtao tytapyã taka tuhke ahno moroto kynexine tãximãse. Morara exiryke otuhpyra kynexine ynororo. 21 Mame morara aexiry totase epe tomo a. Morara exiryke toehse toto morotona Jezu poko.

—Otarãme rowotãko mana, tykase toto ipoko repe.

22 Morarame Moeze omihpyry warãkã, Jerusarã poe aehtyã ynara tykase toto ipoko,

—Jorokohpe mana, Peuzepuhpe, tykase toto Jezu poko. (Peuzepu joroko tamuru esety akorony.)

—Joroko tamuru poe joroko tã tãtanohpãko mana ahno ae, tykase imehnã roropa ipoko.

23 Morarame Jezu a imoihmãkã tykohmase tyya, toto amorepatohme. Ynara tykase ynororo eya xine, —Otãtohxã joroko tã na etãtanohpãko ropa nah oxime? Imepã joroko onutãtanohposaromepyra imepã joroko mana ynaroahnãme toexirykãke. 24 Morararo pata tamurupãkã oseosetaparyhtao, osenahkãko rokã mã toto. 25 Tapyitaãkã roropa osetaparyhtao, osenahkãko rokã toto. 26 Morararo joroko tamuru joroko tã maro osetaparyhtao okynã pyra osenahkãko mã toto oxime toexirykãke.

27 —Etatoko pahne, jamitu tapyã taka omãsaromepyra imepã mana ematonase, esã jamihme exiryke.

Yrome tapyi esã tymyhse ahtao rokã, imãkomory ematonanohnãko mana esã tymyhse exiryke sã rokene. (Morararo joroko tamuru tymyhse ahtao rokã joroko tã tãtãko ropa sã mana.)

28 —Ynara kary se ase oya xine, emero oorypyrykã korokãko Ritonãpo mana. 29

Tykerekerematopōpyry korokāko roropa mana. Toiro rokē onykorokara ekurehnōko mana. Tuzenu kerekerematopōpyry onykorokara mana jūme. Ehxirokehpyra Zuzenu kerekeremahpōkō mana. Etuarimakehpyra roropa toh mana jūme.

30 Morara tykase Jezu typoko, “Jorokohpe nase,” tykase mokaro exiryke.

Jezu eny, zakorō tomo, enara

(Mat 12.46-50; Ruk 8.19-21)

31 Morarame Jezu ē toehse zakorō tō maro. Jezu maro tōtururu se toh kynexine repe. Yrome omōpyra toh kynexine tapyi taka. Jarānao rokē toh kynexine. 32 Jezu zomye ahno typorohse kynexine imoihme. Ynara tykase toto eya,

—Asa oya kynako. Moky reh oeraximāko jarānao, ākorō tō maro, tykase toto eya.

33 Yrome ynara tykase Jezu eya xine,

—Onoky aja mokyro? Onokā jakorō tō mokaro? tykase. 34 Tomyēkō eneryme ynara tykase ynororo,

—Tarōkō ajame toh mana, jakorō tōme roropa mā toto. 35 Ynara exiryke, Ritonōpo omipona exiketō wekyryme mā toto, jakorōme, woryxiryme, ajame, enara, tykase ynororo eya xine.

Otyro puhturu arykane

(Mat 13.1-9; Ruk 8.4-8)

4

1 Morotoino tamorepase ropa toto Jezu a ikuhpo ehpio. Ahno imoihme exiryke tōtyrise ynororo kanawa tohpika aka. Typorohse ynororo kanawa aka. 2 Moroto ahno tuhke tuna ehpio. Mame Ritonōpo omiry enetupuhtoh poko tamorepase toto eya. Ynara tykase ynororo,

3 —Etatoko pahne, otyro puhturu arykane toytose. Sapararahme ipuhturu pahne sā mana ahtatohme. 4

Osema taka ipuhturu ohpahnōko roropa sā mana. Moroto torō tō enahnōko sā mana osema tao exiryke.

5 Topuxikiri htaka roropa ohpahnōko sā ipuhturu mana. Moroto ēxihtāko sā mā repe, nono pitiko nae exiryke. 6 Yrome xixi tutūtase ahtao, axī aremānōko mana. Orihnōko ropa axiny. Tymise pitiko toehse

repe. Yrome ahtara ekurehnōko mana. 7 Mame ātaryka htaka roropa ipuhturu ohpahnōko sā roropa

mana. Morararo ātarykahmā eīko. Ahtara ekurehnōko roropa mana ātaryka htao toexiryke. 8 Mame

nono kurā pona ohpahnōko roropa ipuhturu mana. Moroto ahtāko kure mana otyro zamaro nono

exiryke. Kure ekutāko mana. Kure eperytāko roropa mana. Tuhke eperytāko mana, tykase Jezu eya xine.

9 Morarame ynara tykase ynororo eya xine,

—Otatohxō awahtao xine menetupuhtory, metatory roropa, tykase Jezu eya xine.

Jezu namorepatopōpyry poko

(Mat 13.10-17; Ruk 8.9-10)

10 Moromeīpo ipoetory tō tōturupose Jezu a ahno amereh tykase ahtao. Ynara tykase toto,

—Oty poko hkoh moturuno ynanetaryme? Onenetupuhpyrahme sā ynanakene, tykase toto, tōturupose.

11 —Arypyra, Ritonōpo omiry poko oturūko akene oya xine, Ritonōpo enetupuhtohme oya xine

oesēkōme. Ynekarohpyry tupime mā onenetupuhpynomo a. 12 Naeroro,

“Etāko toh mā repe. Yrome jomiry onenetupuhpyra mā toto.

Enēko roropa mā toto. Yrome zuaro pyra sā mā toto,

tyrypyrykō onurumekara toexirykōke,

Ritonōpo a tyrypyrykō onykorokapopyra roropa toexirykōke,

tykase Jezu typoetory tomo a.

Otyro puhturu arykatopöpyry poko amorepary poko

(Mat 13.18-23; Ruk 8.11-15)

13 Morarame typoetory tõ turuse eya. Ynara tykase ynororo eya xine,

—Ämorepatopöpyrykõ onenetupuhpyra ro oexirykõ popyra mana. Sē onenetupuhpyra awahtao xine, imepÿ ke ämoreparykohtao roropa morararo onenetupuhpyra matose.

14 —Mokyro tÿkyryry puhturu arykane poko sã oturunõ. Mokyro sã mã imepyny, Ritonõpo omiry poko urutono. 15 Mame moro osema taka aohpahtyã sã Ritonõpo omiry etananõ mã repe. Mame joroko tamuru oehnõko axiny, Ritonõpo omiry enahse ikurohtaka xine. 16 Morararo mokaro imehnomo, Ritonõpo omiry etãko roropa toh mã repe. Yrome topuxikiri htaka aohpahtyã sã mokaro mana. Ritonõpo omiry etãko toh mã repe. Atãkyemãko roropa toh mã repe. 17 Yrome mitara Ritonõpo omiry mã ikurohtao xine ekurehnõko. Ahtara ekurehnõko roropa mana. Morotoino okynã pitiko toehse ahtao, tyhtomarykohtao, tykerekeremarykohtao roropa Ritonõpo omiry pokoino, poremãnõko toh mã rahkene. Urumekãko toh mana. 18 Mame tyoro roropa ätaryka htaka aohpahtyamo. Moro sã Ritonõpo omiry etananõ kurohtao ätaryka samo. Ritonõpo omiry etãko toh mã repe. 19 Yrome torëtyke rokë toto tyorõ poko, tytineruke se rokë toehthokõ poko, tymõkomoke se toehthokõ poko roropa. Ritonõpo omiry emãpyra ikurohtao xine, ekurehnõko ätaryka htaka aohpahtyã samo. 20 Yrome mokaro mã nono kurã pona arykahpyry samo. Ritonõpo omiry etaryhtao tyya xine jamaro toh mana. Emãnõko roropa ikurohtao xine mana, aomipona toto exiryke. Ehmataõtãko sã roropa ikurohtao xine mana. Mãsa rokë pyra Ritonõpo omipona exiko toh mana, tykase Jezu eya xine.

Saerehkatoh poko

(Ruk 8.16-18)

21 Morarame ynara tykase ropa Jezu eya xine,

—Kasana mitaka nãparina onyripyra exino mana. Zara zopikoxi onyripyra roropa exino mana. Esaka rokë tyrõko exino mana saerehkatohme. Emero zeipõko mana. 22 Moro sã emero zonëtyã enepõko ropa Ritonõpo mana. Emero enepynÿpotõ enepõko ropa mana. 23 Otato awahtao xine menetupuhpyry, tykase ynororo eya xine.

24 Morarame tõturuse ropa ynororo,

—Jomiry etãko matose repe, jomipona ehtoko. Otato awahtao xine atamorepãko matose kure, tuhkehxo apoiko matose. 25 Morararo otato awahtao xine, itamurumehxo otuarõtanohtorÿko Ritonõpo mana. Yrome otato pyra awahtao xine, ämorepatopöpyrykõ poko wenikehnõko matose emero porehme.

Otyro puhturu ahtary poko

26 Morarame ynara tykase ropa Jezu,

—Ritonõpo tuisame exiry otyro puhturu arykane sã mana. Mame otyro puhturu arykãko sã mana tupito pona. 27 Mame tuenikaroro exiko mana. Okynã pixo toehse ahtao ipuhturu ëxihtãko mana, ahtãko roropa mana onenepyra ahtao. 28 Nono rokë ëxihtanohpõko mana. Morarame ekutãko mana. Mame eperytãko mã rahkene. 29 Mame otyro toehkehse ahtao tupito esë atarypokety sã tuhme tahkãko mana, isapakamyryke.

Moxitatu puhturu ehtopöpyry poko

(Mat 13.31-32,34; Ruk 13.18-19)

30 —Moro sã matose Ritonõpo tupime. Oty sã ropa Ritonõpo tuisame exiry? 31 Otyro sã mana.

Moxitatu samo. Ipuhturu pisarara repe. 32 Yrome tarykase ahtao ahtãko zumo. Amorihãko. Torõ tõ esaryme amoriry exiko mana.

33 Mame tuhke turuse toto, “Ynara sã Ritonõpo tuisame exiry,” katoh poko turuse toto enetupuhtohme eya xine. 34 Imoihmãkõ maro tahtao enetupuhtoh rokë tokarose eya. Mame typoetory maro tahtao

enetupuhtoh poko tutuarōmase ropa toto.

Tyryrykane mynyhpākatopōpyry poko Jezu a

(Mat 8.23-27; Ruk 8.22-25)

35 Morarame tykohmāse ahtao,

—Ehmaropa ikuhpo mōpozakoxi, tykase Jezu typoetory tomo a. 36 Morarame imoihmākō enyokryhtao tyya xine tōtyrise toto kanawaka, Jezu arotohme kanawae. Imep̄y kanawa roropa ikapo toytose. 37 Morarame tyryry tykase itamurume. Tyryry karyhtao saparah tykase pohkane kanawa pokona. Kanawa nerymary se toehse pohkane. 38 Jezu nyhnōko kynexine kanawa ātykyo. Zupuhpyry tapōke kynexine.

—Tuisa, yna pyno pyra hma? Ner̄yko reh sytatohse, tykase toto eya.

39 Mame typakase ropa Jezu. Tyryrykane tymnyhpākapose eya,

—Omynyhpāko, pohkara exiko, tykase Jezu. Mame tyryry tykakehse, mynytyme konōto rokē toehse.

40 Mame ynara tykase typoetory tomo a,

—Oty katoh oserehnōko matou? Jenetupuhpyra ro hmatohu? tykase ynororo eya xine.

41 —To! tykase toto tyya xine tōsenuruhkase toto,

—Moseho reh imehxo nahse. Tyryrykane mynyhpākapono, pohkane roropa mynyhpākapono, tykase toto oseya rokene.

Jorokohpā kurākatopōpyry poko Jezu a

(Mat 8.28-34; Ruk 8.26-39)

5

1 Morarame toeporehkase toto Keraza pona, ikuhpo mōpozakoxi. 2 Morarame kanawae Jezu towōse. Mame mokyro jorokohpā tooehse okep̄po tō poe. 3 Moroto okep̄po tō po esary kynexine. Pake mokyro jorokohpā emyhpopyra ehse. 4 Osemazuhme tymtymyhse repe keti ke. Yrome tymyhtoh kurimene risē tamohmohse eya.

—Sukurematatose, tykase imehnō repe. Yrome onukuremasaromepyra toh kynexine. 5 Nyhpyra ehse ynororo. Okep̄po tō poro ytoytose ynororo ypy poro. Kui kakehpyra ehse, topu ke tōtokotokose roropa ynororo. 6 Morarame Jezu eneryke tyya, moe ahtao ro tururume toytose ynororo eya. Tosekumuru po typorohse ynororo Jezu ēpataka. 7 Opore ynara tykase,

—Oty se hma Jezu ya? Ritonōpo kapuaō mūkuru mase, imehxo exikety mūkuru. Ajohpāme sã josanumara ke exiko, tykase ynororo opore.

8 Osemazuhme Jezu ynara tykase exiryke,

—Mose ae otūtako ropa joroko kahpyry, tykase Jezu exiryke.

9 Mame,

—Onoky oesety? tykase ropa Jezu eya.

—Ekuhp̄yme yna esety nase, tuhke yna exiryke, tykase ynororo Jezu a.

10 —Yna onenyohpyra exiko mya, tykase jorokohpā Jezu a.

11 Mame moroto tuhke poinokoimo kynexine otyro ētuhkāko ypy emory po.

12 —Yna enyohko yna omōtohme poinokoimo aka. Ah ynanomōxi, tykase toto otuhparo Jezu a.

13 Morarame torekohmaryke tonyohse toto Jezu a. Orutua ae tutūtase ropa toto. Poinokoimo aka tomōse toto, joroko tomo. Morarame tururume toytose toto poinokoimo emero porehme. Tyhtose toto ypy emory poe nakuaka. Tyneryse toto emero. Asakoro miume tyneryse poinokoimo.

14 Mame inahpāpōkō toepase patapōkō zuruse, pata moinōkō zuruse roropa. 15 Morarame tuhke panatase tooehse toto Jezu a osenuhmase. Jorokohpanōpo tonese toto a typorohse. Upo tamuruse eya.

Zae oturūko kynexine Jezu maro. Mame tōserehse toto. 16 Morarame morotōkō ynara tykase toto

mokyro enese aehtyamo a,

—Mose jorokohpanōpo. Joroko tō tūtanohpo ropa Jezu, tuhke zae. Mame tyneryse poinokoimo tō emero, tykase toto mokaro a oehsenākomo a. 17 Morarame Jezu a ynara tykase poinokoimo esamōpyamo,

—Ytoko ropa oesaka, tykase toto. Otuhparo tonyohse ropa Jezu eya xine tosaē xine.

18 Morarame kanawaka Jezu aotyryhtao, mokyro jorokohpanōpo tōturuse imaro,

—Tuisa, amaro ytoxi ajohpāme samo, tykase ynororo eya repe.

19 —Arypyra. Atapyī taka rokē ytoko ropa. Oepe tō maro oturuta. Kure ke oturuko okurākatopōpyry ropa poko, opyno jexiry poko roropa, ypoetryme oexiry poko, enara, tykase Jezu eya.

20 Morarame toytose ropa jorokohpanōpo pata konōto poro, Tekapori poro. Moroto tōturuse ynororo, tukurākatopōpyry ropa poko. Mame emero tātākyemase toto, “Emese kure Jezu mana,” tykase toto.

Jairu ytotoptōpyry Jezu a

(Mat 9.18-19; Ruk 8.40-42)

21 Morarame tātakuohse ropa Jezu kanawae mōpozakoxi. Ahno imoihme tooehse ropa eya morotona, ikuhpo ehpiokoxi. 22 Morarame juteu tō atamorepatoh esē tooehse, esety Jairu. Jezu pupuru myhtokoxi typorohse ynororo.

23 —Tuisa kuakorehmako ajohpāme samo. Jēxiry orihnōko mana. Ymaro eropa ajohpāme samo.

Oemary tyrikose epona aekurākatohme ropa, orihpyra aehtohme, tykase ynororo eya.

24 Mame imaro toytose Jezu. Yrome ahno imoihmākō Jezu maro toytose. Ytopyra sā kynexine tuhke ahno exiryke.

Jezu zupō apotopōpyry nohpo a

(Mat 9.20-22; Ruk 8.43-48)

25 Morarame nohpo moroto kynexine munuimohpano. Pakero kure pyra toehse ynororo. 12me jeimamyry taropose kure pyra toexiry poko rokene. 26 Toanahtose eya itamurume. Tuhke opi warōkomo a tukuhse roropa repe, yrome epona pyra, kure pyra itamurume exiryke. Tytinerukehse rokene. 27 Jezu ekary totase tyya exiryke, ikapo toytose ynororo tuhkākō rātakuroko.

28 —Jezu zupō temuhmaryhtao rokē ya ekurākāko ropa ase, tykase ynororo tukurohtao. 29 Morarame zupō tytemuhmase eya. Axī imunuru tymynyhpāse, kure toehse ropa ynororo. Mame toekurākary ropa waro toehse ynororo. 30 Jezu roropa tunukurākahpyry waro kynexine. Tōsenuhmase ynororo t̄ykakoxi. —Onoky jupō temuhmano? tykase ynororo.

31 Morarame ipoetry tomo a tozuhse. Ynara tykase toto,

—Imoihmākō enēko mase. Epurohpurohmāko rokē toh mana. Oty katoh, “Onoky ytemuhmano?” āko mahno? tykase toh Jezu a repe.

32 Yrome Jezu tōsenuhmase ropa t̄ykakoxi tytemuhmahpō enetohme. 33 Mame mokyro tōserehse.

Tykytyky tykase ynororo tukurākase ropa toexiryke. Jezu ēpataka tooehse. Tosekumuru po typorohse.

Emero kure turuse inukurākahpyry a. 34 Morarame ynara tykase Jezu,

—Kuku, jupō mytemuhmano okurākatohme. Kuenetupuhno. Morara exiryke kure ytoko ropa.

Tukurākase ropa mase, tykase Jezu eya.

Jairu ēxiry ēsemākatopōpyry ropa Jezu a

(Mat 9.23-26; Ruk 8.49-56)

35 Morara karyrohtao Jairu tapyī tae tooehse toto.

—Oēxiry norihno. Amorepatō onerekohmara exiko, tykase toto aorikyhyry zumy a.

36 Yrome mokaro otururu totase Jezu a,

—Oserehyra exiko. Ākorehmary enetupuhko ya, tykase Jezu aorikyhyry zumy a.

37 Morarame typoetory tō rokē tarose eya, Peturu, Tiaku, João, enara rokene. Tiaku akorō João kynexine. 38 Morarame toeporehkase toto Jairu tapyī taka. Tuhke ahno moroto kynexine xitaketomo, aorikyhpury hnamononomo, enara. 39 Morarame tapyī taka tomomyryhtao ynara tykase ynororo eya xine,

—Oty katoḥ panaikato matou, xitāko? Xitara ehtoko. Mose orihpyra nase. Nyhnōko rokē nase, tykase Jezu eya xine.

40 Morarame tounohse eya xine. Mame emero Jezu a tutūtanoḥpose ropa toto tapyī tae. Jū maro rokē tomōse toto, jummy, jeny, typoetory tō oseruao. Enara toḥ tomōse aorikyhpury enese. 41 Morarame emary tapoise Jezu a.

—Tarita kumi, tykase ynororo aomiry ae. “Orymo, owōko ropa,” katopo.

42 Morara kaxīpo sā rokē tōsemāse ropa ynororo. Toytoytoḥse ropa ynororo toehsehxo exiryke. 12me ikonopory nae kynexine ynororo. Tākye toehse ropa jū tomo. 43 Morarame ynara tykase Jezu eya xine, —Jekātopyra ke ehtoko, tykase Jezu eya xine. —Mose kure autuhmatoko, tykase roropa ynororo.

Jezu ehtopōpyry Nazare po

(Mat 13.53-58; Ruk 4.16-30)

6

1 Morotoino Jezu toytoḥse ropa tosaka, Nazare pona, typoetory tō maro. 2 Mame juteu tō atamorepatoh taka toytoḥse ynororo oserematohae, ahno amorepatohme tyya. Mame aomiry etananō ynara tykase toto ipoko,

—Otokoino mose tutuarōtase nae? Onoky poe tuaro nae? Onoky poe roropa kurākōkara kurākāko roropa nae? tykase toto.

3 —Yrome Jezu waro sytatose. Wewe poko erohkety mosero, Maria mūkuru. Zakorō tō moxiamo, Tiaku, Joze, Juta, Ximāo, enara. Aoryxiry tō kymaro xine roropa mana, tykase toto ipoko.

Morara exiryke aomiry etary se pyra toḥ kynexine. 4 Mame ynara tykase Jezu eya xine,

—Ritonōpo poe urutōkō se imehnō mā repe. Yrome esarypōkō ise pyra mā toto. Jekyry to roropa ise pyra. Itapyītaōkō roropa ise pyra, tykase Jezu eya xine.

5 Naeroro inukurākatyā kynexine moroto tuhke pyra. Toitoino rokē kurākōkara tapose eya toto ekurākatohme ropa.

6 —To! Jenetupuhpyrahme sā tarōkō nase, tykase ynororo tyya rokene.

Typoetory tō aropotopōpyry Jezu a, 12mākomo

(Mat 10.5-15; Ruk 9.1-6)

Morarame pata pizararākō pona toytoḥse ynororo imehnō amorepase. 7 Mame typoetory tō tykohmase tyya 12me, toto enyohtohme. Asakoro rokē tonyohse toto eya. Ynara tykase ynororo eya xine,

—Joroko tō itūtanoḥpotatoko ropa ahno ae Ritonōpo omi poe. 8 Otyro anaropyra ke ytotoko. Tymyxike rokē ytotoko. Wyi anaropyra ke ytotoko, saku tineru eny tytineruke pyra, enara ke ytotoko, tynaroke pyra. 9 Asapatūkō rokē amurutoko, toiro rokē kamisa amurutoko.

10 —Mame pata pona tooehse awahtao xine, “Jepe, ytapyī taka onyhtokose. Ymaro matose otuhnōko,” karyhtao rokē eya xine imaro xine mytotatose. Moroto rokē mehtatose imep̄y pona oytorykō ponāmero.

11 Mame imehnō typataka xine oytorykō se pyra toto ahtao, ōmirykō etary se pyra roropa toto ahtao mepuhsasakatatose oytorykō ropah̄tao inenerykōme turumekarykō oya xine enetupuhtohme eya xine, tykase Jezu typoetory tō turuse.

12 Morarame toytoḥse toto Ritonōpo omiry poko imehnō amorepase.

—Oorypyrykō irumekatoko emero porehme, tykase toto imehnō amoreparyme tyya xine. 13 Joroko tō tutūtanoḥpose roropa eya xine tuhke. Kurākōkara tukurākase roropa eya xine. Zupuhpyrykō pona

ikasery panō tyrise eya xine toto kurākatohme ropa.

João ahno ĕpurihkane zuhkatopōpyry

(Mat 14.1-12; Ruk 9.7-9)

14 Morarame Erote a morohne totase, Jezu tōsekātose exiryke emero pata tō punero. Ynara tykase toto toitoine Jezu poko,

—Mokyro ahno ĕpurihkahpono. Tōsemāse ropa mana toorihxīpo. Morara exiryke imehnō kurākāko mana, tykase toto ipoko.

15 Mame imehnō ynara tykase,

—Mokyro Eria, tykase toto. Imehnō roropa ynara tykase,

—Mokyro Ritonōpo poe urutono, pake ahtao Ritonōpo poe urutonōpo panō mokyro, tykase toh repe ipoko.

16 Mame morara kary etaryke tyya ynara tykase Erote,

—Arypyra. Otarāme João zuhkahpyry tōsemāse ropa mana, tykase ynororo, João tuhkapose tyya exiryke.

17 Āpuruhyry taka tōmapose kynexine pake eya Erotia omi poe, takorō Firipe pyty omi poe. Takorō pyty maro torēnase ynororo tōseporixīpo. 18 Morara exiryke João tōturuse eya repe,

—Ākorō pyty maro torēnase awahtao popyra mase, tykase ynororo eya repe.

19 Morara exiryke Erotia João zehno toehse yronomyryme. 20 Yrome João etapapory se pyra Erote kynexine zuno toexiryke, kure exiryke, otyro kara João exiryke. Morara exiryke ipynoto sã kynexine. João omiry etaryhtao tyya toepohnohse repe, yrome otara se sã rokē toehse ynororo.

21 Zomory João omiry etary se toehse ynororo. Morarame Erote aniwesario toehse. Tope tō toahmase eya, tuisa tomo, pata esamo, Karireapōkomo, enara, toto otuhtohme tymaro. 22 Erotia ĕxiry roropa tooehse morotona wase. Mokyro eneryke tyya xine tãkye toehse morotōkomo, Erote, tyneahmatyã maro zua kure exiryke. Tuakehse ahtao ynara tykase Erote nohpo a,

—Oturupoko ya ōpenery se awahtao. Otytyko se awahtao ekarōko ase oya. 23 Jesary apiakāko ase irānakuroko oya ekarotohme. Māpyra jomihpyry omipona pyra tokurehse jahtao, ah Ritonōpo juānohno, tykase ynororo eya.

24 Mame morara kary etaxīpo tyya toytose nohpo oturupose tyse a,

—Oty se ākohxo ke ha aja Erote a, tykase ynororo tōturupose tyse a. Mame ynara tykase jeny eya,

—“Ahno ĕpurihkane zupuhpyry se rokē ase,” kaxiko eya, tykase jeny tōxiry a.

25 Mame toytose ropa Erote a ynororo.

—Ahno ĕpurihkane zupuhpyry se rokē ase paratu ao, tykase ynororo eya.

26 Moro etaryke tyya sekese pyrah tykase Erote, João zuhkapory se pyra toexiryke. Tātasamase ynororo repe. Yrome tōmihpyry poko tutuarōtase ynororo. “Ōpenery ekarōko ase oya. Jesary apiakāko ase irānakuroko oya ekarotohme,” katopōpyry poko tutuarōtase ynororo. Katonō tō netaryme morara tykase toexiryke roropa, 27 João zuhkane tonyohse eya āpuruhyry taka. 28 Zupuhpyry tonehse toto a paratu ao ekarotohme nohpo a. Mokyro a tarose tyse a rahkene. 29 Morarame João poetohpyry tomo a ekary totase tyya xine ahtao ekepyry poko tooehse toto zonētohme tyya xine.

Imoihmākō otuhmatopōpyry Jezu a, 5.000mākomo

(Mat 14.13-21; Ruk 9.10-17; Jo 6.1-14)

30 Morarame Jezu nenyohyã tooehse ropa toto. Emero toerohtopōpyrykō poko tōturuse ropa toto, imehnō amorepatopōpyry poko roropa tyya xine. 31 Morarame ahno imoihme kynexine moroto.

Oehnōko morotona toh kynexine. Oseosesahpokoxi āko toh kynexine. Jezu otukuhtome toh kynexine typoetory tō maro. Morara exiryke ynara tykase Jezu typoetory tomo a,

—Ehmaropa tokare pyra. Soserematatose, tykase Jezu typoetory tomo a.

32 Mame toytose toto ahno esaka pyra kanawae. 33 Yrome tonese ynororo tuhkākomo a aytoryhtao. Morara exiryke tutuarōtase toto. Zuapōmase toh toytose tururume pata tō poe, tuna ehpiuroko. 34 Morarame towomyryhtao kanawae ahno imoity tonese eya. Toenupunase ynororo toto poko okyno tō sã toto exiryke, tosēkākara samo. Morara exiryke tamorepase toto eya itamurume. 35 Morarame kokonie pukuro toehse ahtao ipoetory tō toehse eya. Ynara tykase toto Jezu a, —Ahno esary kara sero. Moxiã aropoko ropa pata tō pona. Kohmānōko nase. 36 Tynapyrykō epekahtohme aropoko toto, tykase toh repe.

37 Yrome Jezu a tozuhse toto,

—Autuhmatoko toto, tykase ynororo eya xine.

—Oty ke? tykase toto. —Yna ytory se hma wyi epekahse? Tineru 200mã ke wyi topekahse ahtao ipune pyra mana, ahno tuhke exiryke, tykase toto tosēkomo a.

38 —Otãto wyi nahe? Enetoko keh aporo, tykase ynororo eya xine.

Mame toytose toto enese.

—Omame wyi pisarara nae nase. Kana roropa asakoro nae nase, tykase toto eya.

39 Morarame typorohkapose toto atakenaka ona hpoty htaka. 40 Typorohse toto emero. 41 Mame wyi tapoise tyya ahtao kana maro, kakoxi tōsenuhmase ynororo,

—Kure mase Papa, tykase ynororo. Moromeïpo wyi tytohtohkase eya typoetory a ekarotohme imoihmākomo a ekarotohme. Kana roropa tapiakase eya emero toto zopatohme. 42 Tōtuhse toto tuesapare toh toehse rahkene, emero. 43 Mame tōsē akoïpyry tanÿse ropa eya xine, 12me ruto pehme wyi akoïpyry maro. 44 Mokaro autuhtyã orutua kō rokē ahtao, tuhke exiry 5.000me kynexine toto.

Tuna poro Jezu ytotoöpöpyry

(Mat 14.22-33; Jo 6.15-21)

45 Morarame typoetory tō tyripose ropa kanawaka, osemazuhme toto atakuohtohme mōpozakoxi, Petesaita pona. Jezu moroto ro kynexine. Imoihmākō osekazumary tyya eraximāko kynexine. 46 Morarame tōsekazumakehse toto ahtao toytose Jezu ypy pona oturuse Tummy maro, Ritonōpo maro. 47 Mame tykohmāse ahtao, ipoetory tō tuna rãnao toh kynexine. Jezu rokē toiroro kynexine ipū po. 48 Mame typoetory tō tonese eya, koehāko toto etuarimāko. Tyryrykane konōto toto ytohtome kynexine. Mame kuratiri etapitory zano, toytose ynororo typoetory tomo a. Tuna poro toytose ynororo. Kanawa kuroko toytory se kynexine repe.

49 Yrome ipoetory tomo a tunōmase tuna poro ayatory eneryke tyya xine.

—Ahno akuaryhpyry mokyro, tykase toto, tykohkohtase. 50 Eya xine Jezu tonese. Tōserehse toto emero. Yrome eya xine ynara tykase Jezu,

—Juno pyra ehtoko. Ywy ase. Enaromyra ehtoko, tykase eya xine ynororo.

51 Mame kanawaka tōtyrise ropa ynororo. Mame tyryrykane tymnyhphākapose. Moro eneryke tyya xine tōsenuruhkase toto ipoetory tō itamurume onenetupuhpyra ro toexirykōke. 52 Wyi emākapotopöpyry poko eya tuenikehse toto, onenetupuhpyra ro toexirykōke.

Kurākōkara kurākatopöpyry ropa Jezu a Kenezare po

(Mat 14.34-36)

53 Morarame tātakuohse toh rahkene Kenezare pona Jezu maro. Kanawa tymyhse eya xine. 54 Mame aowomyryhtao Jezu tonetupuhse imehno a. 55 Tururume toytose toto kurākōkara enehse. Toto etueh tapo tonehse toto a Jezu a toto kurākatohme ropa. Emero rokē kurākōkara tukurākase ropa eya. 56 Mame pata tō poro toytose Jezu, pata pisarara poro, pata konōto tō poro. Emero rokē pata tō poro ayatoryhtao kurākōkara tonehse imehno a puroro pona,

—Ajohpāme sã oupō ehpiry ytemuhmaxi, tykase toto Jezu a. Mame zupō tytemuhmase ahtao tyya xine toekurākase ropa toto emero.

Juteu tamuru tō namorepatopōpyry

(Mat 15.1-9)

7

1 Morarame parixeu tō toytose Jerusarē poe Moeze omihpyry poko amorepatōkō maro Jezu enese. 2 Mame Jezu poetory tō tonese eya xine. Osemahpyra otuhnōko toh kynexine. Parixeu tō omihpyry omipona pyra sã toh kynexine.

3 Mokaro parixeu tō, tytamurukō omihpyry poe, tōsemahse tahtao xine rokē otuhnōko toto. Morararo imehnō emahpōko roropa toto. 4 Tooehse ropa osepekahtoh poe tahtao xine otuhpyra ehse toto osemahpyra tahtao xine. Tynepekahtyäkō kurikase roropa toto. Tuhke juteu tō namorepatoh ehse roropa kaneku kurikary poko, oripo tōkehko kurikary poko kurimene risē tōkehko kurikary poko. Morohne poko juteu tō namorepatoh ehse.

5 Mame tōturupose toto Jezu a, ynara tykase toto,

—Oty katoh koh opoetory tō putu pyra rokē nae? Osemahpyra rokē otuhnōko toto, tykase toto Jezu a.

6 Mame Jezu a tozuhse toto,

—Ajoajohpākōme matose. Zae Izaja opoko xine kynoturune. Ynara tykase ynororo,

“Ōmirykō ke rokē kure jyrīko matose.

Yrome okurohtao xine ymaro pyra matose ipunaka.

7 Toiparo rokē kure jyrīko matose, jomipona pyra awahtao xine.

Jomiry tytyorōmase oya xine.

Tymyakāmase roropa oya xine ōmirykō ke.

Morara exiryke ōmirykō etary se hkopyra ase,”

tykase Izaja pake opoko xine, tykase Jezu eya xine.

8 —Ritonōpo nyriphpyry onyripyra matose. Atamurukō omipona rokē matose.

9 —Ritonōpo nyriphpyry myakāmāko matose atamurukō namorepatopōpyry ke. 10 Ynara Moeze

nekarohpyry Ritonōpo omi poe, “Omykō poko oenupunatoko, asakō poko roropa oenupunatoko.

Taorihmaposēme rokē tumykō kerekeremananō mā kure,” tykase Moeze nymerohpyry. 11 Yrome ynara

matose Ritonōpo omiry tyorōmāko. Ynara āko matose imehnomo a, “Omykomo a otyro ekarory se pyra

awahtao xine, ynara kahtoko rokē eya xine, ‘Otyro pyra ase,’ kaxitoko rokē eya xine. ‘Nae ase repe,

ynekarory rokē Ritonōpo a ,’ kaxitoko omykomo a,” āko matose imehnō amorepāko. 12 Oty katoh

tumykō poko aenupunahtome matou morara āko? 13 Imehnomo a Ritonōpo omiry etahtome matose

morara āko. Atamurukō namorepatopōpyry ke rokē Ritonōpo omiry tyorōmāko matose. Morara matose

tyrīko, tykase Jezu eya xine.

Iirypyryme ehtoh poko

(Mat 15.10-20)

14 Morarame imoihmākō tykohmase ropa tyya. Ynara tykase ynororo eya xine,

—Kuetatoko emero, otato oehtohkōme. 15 Otyro iirypyryme ahno onyripyra mana. Yrome tukurohtao

iirypyryme ahno ahtao rokē mā iirypyryme samo. 16 (Āmoreparykō waro se awahtao xine, otato

ehtoko, tykase ynororo eya xine.)

17 Mame ahno turumekase ropa eya. Mame tapyi taka tomōse ahtao, ipoetory tō tōturupose Jezu a

tamorepatopōpyrykō poko. 18 Mame tozuhse toto eya,

—Amarokō roropa onenetupuhpyra matou? Etatoko pahne, emero otyro enapyryhtao oya xine

iirypyryme rito pyra mana. 19 Waku aka rokē tykryysā omōnōko mana. Yrome kuzenukō aka omōpyra

mana. Mame wekanohtao tūtāko ropa mana, tykase ynororo.

(Morara exiryke emero tōsē kure Jezu omi poe.)

20 Morarame töturuse ropa ynororo eya xine. Ynara tykase ynororo,
 —Okurohtao xine popyra awahtao xine iirypyryme exiko matose. 21 Ynara exiryke, tukurohtao xine
 iirypyryme epohnohketö popyra exiko roropa mana. Ematonäko te, karimotäko te, imehnö pyty poko
 exiko te, 22 imehnö mökomory poko typhenetarykö poko te, imehnö ryhmary poko te, imehnö
 enekunopyry poko te, typhenetatox xihpyry poko te, imehnö zumoxike exiry poko te, imehnö
 kerekeremary poko te, tösenetaonopyry poko te, ajoajohpe toexirykö poko, enara. 23 Morohne tütäko
 mä okurohtae xine. Naeroro iirypyryme exiko matose, okurohtao xine popyra oepohnopyryköke, tykase
 Jezu eya xine.

Jezu enetupuhtopöpyry nohpo a

(Mat 15.21-28)

24 Morotoino toytose ropa ynororo Tiro ehpikoxi, Xitö ehpikoxi roropa. Mame tapyi taka tomöse
 ynororo tokare pyra repe. Yrome otönēsaromepyra kynexine ynororo. 25 Morarame nohpo tooehse
 Jezu a. Tosekumuru po typorohse ynororo nono pona, Jezu epäpataka, Jezu ekary totase tyya exiryke. 26
 Mokyro nohpo exiry jorokohpe kynexine. Juteukara kynexine ynororo, Xiro Penixiapö kynexine,
 —Joroko itütanohpoko ropa jëxiry ae, ajojpäme samo, tykase ynororo Jezu a. 27 Morarame Jezu a
 tozuhse,

—Ah poetohti tö osemazuhme notuhno. Popyra mä kaikuxi zopary poetohti zoh ke, poetohti otuhpyra
 ro ahtao, tykase ynororo nohpo a.

28 —Ajohe pyra mase Tamuxi. Kaikuxi sä ynanase katohto. Morara exiryke poetohti napyry akumuru
 eraximäko sä ynanase, tykase, nohpo a tozuhse.

29 Mame töturuse ropa Jezu eya,

—Kure kuezuhno kuku. Morara tykase oexiryke ytoko ropa atapyi taka. Oëxiry ae joroko tutütanohpö
 ropa mana, tykase Jezu eya.

30 Mame tytapyi taka toytose ropa nohpo. Töxiry tonese, tohrame nyhtoh po. Pake joroko
 tutütanohpöse ropa zae.

Typanarëkara pusopusome aomiry aexihpyry kuräkatopöpyry ropa

31 Morarame toytose ropa Jezu Tiro ehpioino Xitö poro, Karirea kuaka, ikuhpo kuaka. Tekapori
 ränakuroko toytose ynororo, omame porehme pata ränakuroko. 32 Mame Jezu a typanarë kara tonehse
 imehnomo a. Pusopusome roropa tomire kynexine,

—Mose apoko ajojpäme samo, aekuräkatohme ropa, tykase toto Jezu a. 33 Morarame kuräkara arone
 myahxo. Morarame tomary tömase ipanary aka. Ituh tykase roropa ynororo. Moromeïpo inuru
 tytemuhmase tomary ke. 34 Mame kakoxi tösenuhmase ynororo. Pusuh tykase. Mame ynara tykase
 ynororo kuräkara a,

—Otato exiko, tykase eya.

35 Mame otato toehse ropa kuranöpokara. Pusopusome pyra roropa aomiry toehse. Kure ropa toehse
 ynororo.

36 —Jekätopyra ehtoko, tykase Jezu imoihmäkomo a repe. Yrome itamurume tokätose toto a. 37
 Tösenuruhkase toto emero.

—To! Emero Jezu nukuräkatyã kure. Typanaremÿpokara otato ropa toehse. Pusopusome tomiremÿpo
 aomiry kure toehse ropa, tykase toto tösenuruhkase.

Imoihmäkö otuhmatopöpyry Jezu a 4.000mäkomo

(Mat 15.32-39)

1 Morotoino imoihmākō tōximōse ropa. Mame tohke pyra toexirykōke otuhpyra toto. Mame Jezu a typoetory tykohmase tyya. Ynara tykase ynororo toto a,
 2 —Imoihmākō pynanohnōko ase ymaro oseruao tohke pyra tynhse toto exiryke. 3 Toto aropory ropahtao ya itapyikō taka etuarimāko mā toto tynahke pyra toexirykōke. Moino tooehse toto tarona.
 4 Mame ipoetory tomo a tozuhse,
 —Otātohxō ke imoihmākō otuhmāko sytatou osepekahtoh pyra ahtao? tykase toto.
 5 Mame ynara tykase ynororo,
 —Otāto wyi nae matou? tykase.
 —7me rokene, tykase toto.
 6 Morarame imoihmākō typorohkapose Jezu a nono pona. Mame wyi tapoise eya. Mame, “Kure mase Papa,” kaxīpo Ritonōpo a, wyi tytohtohkase rahke eya. Typoetory tomo a tokarose ekarotohme imoihmākō otuhtohme. 7 Mame kana inunōkara roropa nae kynexine tuhke pyra.
 —Papa, kure mase, tykase ropa ynororo. Morara kaxīpo tyya typoetory tomo a tapiakapose kana imoihmākō zohme. 8 Mame tōtuhse toto tuesapare. Mame zohkō akoīpyry tanŷse ropa eya xine, 7me ruto pehme. 9 Mokaro tōsē ōnyhpōkō tuhke exiry 4.000me exisasaka kynexine.
 Morarame imoihmākō tonyohse ropa eya. 10 Moromeīpo kanawaka tōtyrise ynororo, typoetory tō maro. Toytose toto Taumanuta pona.

Jezu jamitunuru enery se parixeu tō ehtopōpyry

(Mat 16.1-4)

11 Morarame parixeu tō tooehse Jezu a. Sekere tykase toto Jezu a. Jezu nukurākatary enery se roropa toh kynexine repe, zuaro toehtohkōme. 12 Yrome Jezu typoihtose eya xine. Morara exiryke pusuh tykase ynororo moe toko. Ynara tykase ynororo eya xine,
 —Unukurākatary enery se matose repe, yrome onenepopyra ase oya xine, tykase Jezu eya xine.
 13 Mame tynomose ropa toto Jezu a. Kanawaka tōtyrise ropa toytotohme mōpozakoxi.

Otyro porutatoh sā parixeu tō ehtopōpyry

(Mat 16.5-12)

14 Morarame ipoetory tō turukō poko tuenikehse toto. Toiro wyi pitiko rokē kanawao kynexine. 15 Morarame ynara tykase Jezu typoetory tomo a,
 —Tomeseke ehtoko parixeu tō poko Erote tō poko roropa. Otyro porutatoh sā mā toto.
 16 —Otara āko hkoh Jezu nae? Otārāme wyi pyra kuexirykōke, tykase toto oxime rokene.
 17 Yrome mokaro etaryke tyya ynara tykase Jezu eya xine,
 —Oty katoh wyi poko oseosezuhnōko matou wyi pyra oexirykō poko? Jomiry onenetupuhpyra ro matou? Oty katoh tūpore sā oupuhpyrykō nae? 18 Tonure amarokō repe yrome onetōkara sā matose. Typanare roropa amarokō repe yrome otato pyra amarokomo. Āmorepatopōpyrykō poko wenikehnōko matose. 19 5mā wyi tytohtohkase ya, 5.000mākō otuhmatohme. Mame otāto tonahsē akoīpyry manymyatosē ruto pehme? tykase Jezu eya xine.
 —12me ruto pehme, tykase toto.
 20 —Moro ke roropa 7me wyi ahtao 4.000mākō otuhmatohme, otāto manymyatosē tonahsē akoīpyamo? tykase ynororo, tōturupose eya xine.
 —7me ruto pehme, tykase toto eya.
 21 —Moro poko onenetupuhpyra ro matou? tykase Jezu eya xine.

Tonurēkara kurākatopōpyry Jezu a Petesaita po

22 Morarame Petesaita pona toytose toto. Mame ahno a tonurēkara tonehse Jezu a,
 —Ajohpāme sā mose apoko, tykase toto. 23 Mame Jezu a kurākara tarose ameke emary poko pata

ehpikoxi. Ituh tykase ynororo enuru pona. Mame enuru tapose eya,

—Osenuhmāko ma? tykase, tokaropose eya.

24 Mame mokyro tōsenuhmase repe,

—Ahno tō enēko ase repe. Yrome wewe panō rokē ytoytōko nase, tykase ynororo eya.

25 Mame enuru tapose ropa Jesu a. Mokyro kure toehse ropa. Kure tōsenuhmase ropa ynororo rahkene.

26 —Atapyī taka topohme ytoko ropa. Pata pona ke ytopyra exiko, tykase Jesu tonurem̄ypokara a.

Peturu nurutopōpyry Jesu poko

(Mat 16.13-20; Ruk 9.18-21)

27 Morarame Jesu mya toytose typoetory tō maro imehnō pata pona, Sezarea Piripopō pona. Osemae toytorykohtao Jesu tōturuse,

—Onokyme ha ahno a? tykase.

28 Ipoetory tomo a tozuhse,

—Ahno ēpurihkane Joāome oekarōko mā toto. Imehnomo, “Eria,” āko. Imehnomo, “Ritonōpo omi poe urutono,” āko, tykase ipoetory tomo.

29 Tōturupose ropa Jesu eya xine,

—Yrome oya xine ke? Onokyme ha oya xine? tykase ynororo.

Mame Peturu a tozuhse,

—Ritonōpo nymenekahpyry mase sero nonopōkō kurākaneme, tykase ynororo eya.

30 —Jekaro pyra ke ehtoko! tykase Jesu typoetory tomo a.

Toorikyry poko Jesu oturutopōpyry, tōsemamyry ropa poko roropa

(Mat 16.21-28; Ruk 9.22-27)

31 Mame typoetory tō maro tōturuse Jesu,

—Kapu ae Ayhtohpyry ase. Yrome tuhke rokē urumekāko mā toto, oesēkomo, Ritonōpo maro oturuketomo, Moeze omihpyry warōkomo, enara. Utuarimapōko mā toto. Jorihmāko mā toto. Yrome oseruao tōmehse ahtao ēsemānōko ropa ase, tykase ynororo.

32 Zae tōturuse ynororo eya xine. Mame Peturu a tarose ynororo mya zupokatohme repe. 33 Mame

Jesu toeramase t̄ykakoxi typoetory enetohme. Peturu turuse ropa eya. Ynara tykase ynororo eya,

—Mynyhme exiko! Joroko tamuru sā mase. Jakorekehkāko mase. Āmoreme rokē morohne poko osenetupuhnōko mase ahnome oexiryke. Ritonōpo poe pyra ōsenetupuhtoh mana, tykase Jesu Peturu a.

34 Mame emero imoihmākō tykohmase tyya typoetory maro.

—Jenetuputyryhtao oya xine oesēkōme jomipona ehtoko. “Ywy roro ynyriry menekāko ase,” kara

ehtoko. Ymaro oorikyrykō enetupuhtoko oorypyrykō poko. Ymaro rokē ehmaropa. 35 Toetuarimary

kurūke ypoetoryme se pyra exiketō mā ytopyra mā toto Ritonōpo esaka toorihse tahtao xine. Yrome

torētyke pyra exiketō mā typenetatohkō poko jomipona se toexirykōke, toetuarimarykohtao ro, mokaro ytōko mā toto Ritonōpo esaka. Owōnōko ropa mā toto.

36 —Otātōhxo kure emero porehme apoiryhtao oya, oorikyry ke rokē epehmatohme? 37

Omōkomorykō ke matose orihpyra oehtohkō onepehmara ekurehnōko. 38 Ihxip̄yke awahtao xine

ypoko jomihpyry poko roropa apatao xine oepe tō iiryp̄yryme exiketō maro, ywy roropa ihxip̄yke exīko ase opoko xine jyhtory ropah̄tao kapu ae Ritonōpo nenyoh̄tyā kurākō maro, tykase Jesu eya xine.

9

1 Moromeīpo ynara tykase ropa Jesu, —Otuarōtatoko. Toitoinē matose orihpyra ro awahtao xine Ritonōpo tuisame exiry enēko, tykase Jesu eya xine.

Jezu maro Moeze ehtopõpyry Eria maro

(Mat 17.1-13; Ruk 9.28-36)

2 Morarame 6me tõmehse ahtao, typoetory tõ tarose ypy kae tokõ pona. Peturu te, Tiaku te, João, enara toh tarose eya. Moroto tanyhtase ynororo. 3 Zupõ saereme toehse, karimutume konõto toehse, emero ikurikasenã motye toehse, karimutume kuhse. 4 Morarame Eria tõ tooehse Moeze maro, pake Ritonõpo omi poe urutonõpo tomo. Mame toto neneryme Jezu maro oturũko toh kynexine. 5 Morarame toto eneryke tyya ynara tykase Peturu,

—Jezu, kure reh taro sytatoehse. Tapyi pitiko ynanamoxi oseruao axĩtao rokene, toiro atapyĩme, toiro Moeze tapyĩme, toiro roropa Eria tapyĩme, enara ehtohme, tykase ynororo eya.

6 Tõserehse toexiryke morara tykase Peturu. 7 Mame Jezu tõ otururuhtao ro akurũ tooehse.

—Umũkuru nymyry mosero, Umũkuru kurano. Mose omiry etatoko, tykase Ritonõpo akuru htae.

8 Morarame,

—ÿkae enexi ropa, tykase toh repe. Toto esahpyry pona rokẽ tõsenuhmase toto. Jezu rokẽ moroto, toto esahpyry po.

9 Morarame tyhtorykõ ropahatao ypy poe ynara tykase Jezu typoetory tomo a,

—Kapu ae Ayhtohpyry ase. Ajohpãme sã ynaenetopõpyry oya xine onekãtopyry ehtoko aporo.

Jorihxĩpo tõsemãse ropa jahtao rokẽ mekarotatose, tykase ynororo typoetory tomo a. 10 Morara exiryke onekãtopyry tokurehse toto. Oxime rokẽ tõturuse toto.

—O tara nykã hkoty, “Jorihxĩpo tõsemãse ropa jahtao rokẽ mekarotatose,” nykano, tykase toto oxime rokene. 11 Morarame tõturupose ropa toto Jezu a,

—Oty katoh Moeze omihpyry warõkõ ynara ãko nae, “Eria osemazuhme oehnõko mana. Okomino Ritonõpo nymenekahpyry,” ãko toh nae? tykase toto Jezu a.

12-13 Ynara tykase Jezu eya xine,

—Ajohpe pyra. Oehnõko osemazuhme mana imehnõ tuarõtanohpotohme Ritonõpo poka, toto a Ritonõpo enetupuhthohme repe. Yrome Eria tooehse. Mame taosanumase toto a iiryhmary se toexirykõke. Ritonõpo omi poe urutõ nymerohpyryae ro tyhtomase eya xine. Etatoko pahne. Oty katohme roropa ynara ãko Ritonõpo omihpyry, “Kapu ae Ayhtohpyry etuarimãko mana itamurume. Irumekãko roropa mã toto” ãko Ritonõpo omiry nae? tykase Jezu eya xine.

Poeto kurãkatopõpyry ropa Jezu a

(Mat 17.14-21; Ruk 9.37-43)

14 Morarame tyhtose ropa tahtao, typoetory tõ maro, imoihmãkõ tonese. Moeze omihpyry warõkõ maro oseosezuhnõko toh kynexine. 15 Mame Jezu tonese tyya xine ahtao tãtãkyemase toto imoihmãkomo. Eya toytose toto axiny, aomikase. 16 Mame Jezu tõturupose eya xine,

—Oty poka oseosezuhnõko matokene mokaro maro? tykase Jezu eya xine.

17 Toirono a Jezu tozuhse,

—Umũkuru enehno oya repe jorokohpe exiryke. Tunurẽkara sã roropa mana. 18 Ayaytoryhtao emapõko mã joroko nono pona. Mame akuakurotãko mana. Taryhtaryh ãko mana. Etoetopohmãko roropa mana. “Joroko itũtanohpoka ropa,” yka repe opoetory tomo a. Yrome onutũtanohposaromepyra toh kynako, tykase ynororo Jezu a.

19 Morarame ynara tykase Jezu eya xine,

—O tara ahtao jenetupuhnõko matou? Amaro xine ase repe ãmorepatorỹko. Okynã amaro xine ywy repe. Yrome jomiry onenetupuhpyra ro amarokomo. Omũkuru enehta xiaro yneneryme, tykase Jezu eya xine.

20 Mokyro tarose toto a Jezu neneryme. Jezu eneryke tyya mokyro tytotytopohmapose joroko a.

Toepukase ynororo nono pona. Tõsõtõritõrimase. Takutakurotase roropa ynororo.

21 —Pake serara nah? tykase Jezu kurãkara zummy a.

—Pake moinoro nase serara, pitiko ro tahtao. 22 Tuhke rokē apoto htaka tomapose nase joroko a. Nakuaka roropa tomapose aorihthome repe. Ikurākary waro awahtao umükuru ikurākako, yna pyno awahtao, tykase jorokohpā zummy Jezu a.

23 Ynara tykase Jezu eya,

—Enetuputyryhtao oya emero riry waro ase Ritonōpo poe. Wenetupuhko pahne, tykase Jezu jorokohpā zummy a.

24 Morara kary etaryke tyya tosenakūnuhse,

—Enetupuhnōko ase! Wakorehmako oenetupuhtohme nymyry ya, tykase ynororo tyxitaryme.

25 Morarame imoihmākō atanonopyryke tymyhtokoxi, ynara tykase Jezu joroko a,

—Tunurēkara mase joroko, typanare pyra roropa mase. Mose ae otūtako ropa jūme, tykase ynororo.

26 Kui tykase joroko tykytyky tykamexipose tutūtaryme. Mame aorikyhyry sā toehse ynororo joroko esahpyo. Moro eneryke tyya xine,

—Norihno hro, tykase imoihmākomo. 27 Mame tanÿse ropa Jezu a tomary ke. Towōse ropa. 28

Morarame tapyi taka tomōse ahtao, ipoetory tō tōturupose Jezu a,

—Oty katohme joroko tūtara kynako yna omipohna? tykase toto Jezu a.

29 Ynara tykase Jezu,

—Joroko tō tūtara oturupyra awahtao xine Ritonōpo a. Morara exiryke tūtara kynako, tykase.

Tōturuse ropa toorikyry poko, tōsemamyry ropa poko, enara

(Mat 17.22-23; Ruk 9.43-45)

30 Morotoino toytose toto Karirea rānakuroko. Tokare pyra toytory se Jezu typoetory amorepatohme.

31 Mame ynara tykase ynororo typoetory tomo a,

—Kapu ae Ayhtohpyry ase. Yrome jewokāko toh mana ahno a jorihmapotohme. Mame taorihmapose jahtao ēsemānōko ropa ase oseruao tōmehse ahtao, tykase Jezu typoetory tomo a.

32 Zuario pyra sā ipoetory tō kynexine. Yrome oturupyra toh kynexine aomihpyry poko tyhxirorykōino.

Tuisamehxo ehtoh poko

(Mat 18.1-5; Ruk 9.46-48)

33 Morarame Kapanāi pona toytose toto. Tapyi taka tomomyryhtao tōturupose typoetory tomo a Jezu,

—Oty poko moturutou osemāe? tykase toto a ynororo.

34 Yrome onezuhpyra toh kynexine, tōsezusezuhse toexirykōke tamuxime toehtohkō poko. 35 Mame typorohse tahtao typoetory tō tykohmase tyya, 12mākomo.

—Tuisame se oexirykō se awahtao xine imehnō akorehmatoko, tykase Jezu eya xine.

36 Mame poeto pitiko tyrise eya toto rānaka, xikihme. Mame tonaka tyrise eya eahmatohme. Ynara tykase ynororo,

37 —Poeto pyno awahtao xine ypoetoryme aexiryke ypyno roropa matose. Morararo ypyno awahtao xine ywy ro rokē kara pyno matose. Ritonōpo maro roropa yna pyno matose, jenehpohpōme Ritonōpo exiryke, tykase ynororo eya xine.

Kyzejno xine pyra exiketō mā kuakorehmanekōme

(Ruk 9.49-50)

38 Mame ynara tykase João,

—Jezu, imepÿ ynanenease joroko tō tūtanohpōko oesety poe. Morara kamexipopyra ynanexiase eya kymaro xine pyra aexiryke, tykase ynororo repe.

39 Yrome ynara tykase Jezu eya,

—Ah joroko tō tūtanohpō ropa jesety poe. Imepÿ kurākary waro tahtao jesety poe kure ymaro mana.

Ykerekemara mana. 40 Imehnõ kyzehno xine pyra ahtao kuakorehmatorÿko mana. 41 Etatoko pahne, imepÿ tuna ekaroryhtao õkurukõme ypoetoryme oexirykõke epehmary poko wenikehpyra Ritonõpo mana.

Popyra kyyrypyrykõ exiry poko

(Mat 18.6-9; Ruk 17.1-2)

42 —Yrome imepyny a jenetupuhkehporihtao poetohti a jomiry enetupuhpitoryhtao eya xine, kurehxo mokyro pynyry ae topu konõto mykyry, ematohme nakuaka inerytohme. Ahtao poetohti onenekunohpyra mana. 43 Mame oemarykomo a popyra orirykohtao osemahkatoko! Kurehxo oya xine etone tomahke awahtao xine Ritonõpo esaka omõnõko matose. Popyrahxo oya xine oemarykõ osetato ahtao apotoimo htaka rokẽ omõnõko matose, ezehpÿ htaka. 44 Moroto moromoro poenõ enahpyra mana. Apoto roropa ezehpÿra mana. 45 Opupurukõ roropa popyra etone ahtao epuhkatoko! Kurehxo oya xine Ritonõpo esaka õmomyrykõ etone tupuhke pyra. Popyrahxo oya xine mã osetato opupurukõ ahtao apotoimo htaka rokẽ ytõko matose. 46 Moroto moromoro poenõ enahpyra mana. Apoto roropa ezehpÿra mana. 47 Morararo oenurukõ etone popyra ahtao toutoko! Kurehxo oya xine mã Ritonõpo esaka õmomyrykõ etone tonure awahtao xine. Popyrahxo oya xine mã osetato tonure awahtao xine apotoimo htaka rokẽ ytõko matose. 48 Moroto moromoro poenõ enahpyra mana. Apoto roropa ezehpÿra mana.

49 —Apoto ke uuru zahkãko exino mana zemimehxo aehtohme. Moro sã oetuarimarykõ ke kurehxo exiko matose, Ritonõpo omiponahxo. Morararo tõsẽ sautu maro ahtao, tompore exiko. Moro saaro oetuarimarykohtao tomporehxo sã exiko matose Ritonõpo a. 50 Sautu sãme ahtao kure rahkene. Yrome sãme pyra toehse ahtao otyme kure? Arypyra. Typahsẽme rokẽ mana. Amarokõ ke? Sautu kurã sã ehtoko. Kure ehtoko imehnõ maro. Oseosezuhpyra ehtoko roropa, tykase Jezu eya xine.

Typyxiãkõ rumekary poko

(Mat 19.1-12; Ruk 16.18)

10

1 Morotoino Jezu toytose ropa Jutea pona, Joatão mõpozakoxi. Moroto ahtao ahno imoihmãkõ toytose eya. Mame tamorepase ropa toto eya. Toipe ynororo ehse amorepato.

2 Morarame parixeu tõ tooehse Jezu kuhse.

—Kurehxo hna Ritonõpo a orutua a tyyty rumekary? tykase toto eya.

3 Ynara tykase Jezu eya xine,

—Otara ãko hna Moeze omihpyry moro poko? tykase, tõturupose ynororo eya xine.

4 —Moeze omihpyry ynara ãko, “Ah pape merono tyyty rumekary poko, tyyty a ekarotohme.

Moromeipo ah tyyty rumekano,” ãko, tykase toto eya.

5 Mame ynara tykase Jezu eya xine,

—Zehnotokõme oexirykõke moro tymerose Moeze a repe. 6 Yrome emero tyrikehse ahtao Ritonõpo a, ynara tykase ynororo, “Orutua tyrise ya nohpo maro. 7 Naeroro orutua tummy rumekãko mana, tyse rumekãko roropa mana tyyty maro rokẽ toehtohme. 8 Mame mokaro asakoro toiro pÿ sã exiko mana, tyyty maro rokene,” tykase Ritonõpo toto poko. Naeroro asakoro pÿme pyra sã toh mana. Toiro pÿme rokẽ mã toto tyyty maro. 9 Oximaro tyripose Ritonõpo a exiryke, ah oxirumekara toh nexino, tykase Jezu eya xine.

10 Morarame tapyi tao ahtao ipoetory tõ tõturupose ropa moro poko. 11 Mame ynara tykase Jezu eya xine,

—Imepÿ nohpo maro oerënatohme opyxiãkõ rumekaryhtao oya xine iirypyryme matose. 12 Morararo nohpo imepÿ maro torënatohme tynio rumekaryhtao eya, morararo exiko mana iirypyrymãme rokene,

tykase Jezu eya xine.

Kure poeto tō riry poko Jezu a

(Mat 19.13-15; Ruk 18.15-17)

13 Mame typoenōkō tonehse nohpo tomo a Jezu a, toto eahmatohme. Yrome ipoetory opore tōturuse nohpo tomo a. 14 Autururukō etaryke tyya tohne toehse Jezu typoetory tō poko.

—Ah poetohti noehno ya tooepyrykō se toto ahtao. Toto anaropopyra ehtoko ywinoino. Moxiaropākō Ritonōpo esaka ytōko mana, tosēkōme axī enetuputyryke eya xine. 15 Etatoko ke. Ritonōpo enetuputyryhtao oya xine oesēkōme poetohti saaro, omōnōko matose Ritonōpo esaka. Māpyra onenetupuhpyra awahtao xine omōpyra matose Ritonōpo esaka ekurehnōko, tykase Jezu. 16 Morara kaxīpo poetohti tapoise Jezu a eahmatohme. Zupuhpyrykō pona tomary tyrise eya kure rokē toto ripotohme Ritonōpo a.

—Kure rokē oripotorŷko ase Papa kapuaono a, tykase ynororo eya xine.

Tymōkomoke itamurume exikety

(Mat 19.16-30; Ruk 18.18-30)

17 Morarame aytory ropahtao, orutua toytose tururume eya. Tosekumuru po typorohse ynororo Jezu ēpataka.

—Tamuxi, kure amorepatō mase. Naeroro ekaropoxi oya. Oty riko ha Ritonōpo neneryme imaro jehtohme jūme, toorihse jahtao? tykase ynororo Jezu a.

18 —Oty katoh “Kure mase,” mykā ya? Ritonōpo rokē kure mana. 19 Ritonōpo omiry waro mase. Aomiry tymerose Moeze a, “Imehnō nohpo poko pyra ehtoko. Imehnō onetapara roropa ehtoko. Omatome pyra ehtoko. Imehnō onenekunohpyra ehtoko. Ajoajohpe pyra ehtoko. Kure asakō tyritoko. Omykō roropa kure tyritoko,” āko Ritonōpo omiry, tykase Jezu eya.

20 Mame mokyro a tozuhse,

—Moino ro ase Ritonōpo omipona ypoetoe ro, tykase ynororo eya.

21 Mame mokyro pyno toexiryke Jezu ynara tykase eya,

—Toiro mase onyripyra ro. Ytoko, omōkomory emero ekamota tineru apoitohme oya. Moromeīpo otinerū ekaroko tymōkomokākara a. Imeīpo osehko ropa xiara, ymaro oytotohme. Morara ahtao tymōkomoke exiko ropa mase Ritonōpo esao, tykase eya Jezu.

22 Morarame akye pyra toehse ynororo. Tymōkomory mynyhmaryme toytose ropa ynororo, tymōkomoke itamurume toexiryke. 23 Mame tŷkakoxi tōsenuhmase Jezu. Ynara tykase typoetory tomo a ynororo,

—Tuhke pyra tymōkomokā Ritonōpo poetyryme exiko mana, tykase ynororo.

24 Mame morara kary etaryke tyya xine ipoetory tō toemynyhmase itamurume. Mame ynara tykase ropa Jezu,

—Etatoko pahne, tuhke tytinerukā Ritonōpo onenetupuhpyra tosēkōme torētyke toexirykōke tytinerūkō poko. 25 Kameru kawaru sā konōto. Jawi eutary pitiko nae. Kameru jawi eutary aka omōpyra mana ipune pyra exiryke. Moro saaro tuhke tymōkomokā omōpyra Ritonōpo esaka mana, tosēkōme Ritonōpo onyripyra toexirykōke.

26 Mame toepohnohse toto morara kary etaryke tyya xine.

—To! Morara ahtao, onoky Ritonōpo poetyryme exiko na? Ekurehnōko rokē exino, tykase toto oxime rokene.

27 Mokaro etaryke tyya ynara tykase Jezu,

—Āmoreme xine matose omōpyra Ritonōpo esaka. Yrome Ritonōpo typoetyryme orirykō waro mana, tykase Jezu eya xine.

28 Morarame ynara tykase Peturu,

—Etako ke, emero ynanurumekase amaro yna ytotohme, tykase Peturu.

29 Mame Jezu a tozuhse,

—Etako pahne, emero turumekase oya xine ahtao jomi poe, atapyiny te, ākorōkomo, oryxirykomo, asakomo, omykomo, opoenōkomo otupikomo, emero turumekase oya xine ahtao 30 imotye ekarōko ropa mā Ritonōpo, atapyīkomo, ākorōkomo, oryxirykomo, asakomo, opoenōkomo, otupikomo emero. Yrome etuarimāko roropa matose sero nono po. Moromeīpo Ritonōpo esao orihpyra matose jūme. 31 Mame tuhke tuisāpo tō tuisame pyra exīko Ritonōpo esao. Tuhke tuisāpo kara roropa tuisame exīko Ritonōpo esao, tykase Jezu eya xine.

Jezu oturutopōpyry ropa toorikyry poko

(Mat 20.17-19; Ruk 18.31-34)

32 Morarame toytose toto Jerusarē esemary ae, Jezu osemazuhme, ipoetory tō īkapo. Emynyhmāko toh kynexine. Imehnō roropa imaro ytoketō enaromŷke sã ytōko toh kynexine.

Mame typoetory tō 12mākō turuse ropa eya totapary poko.

33 —Etatoko pahne, Jerusarē pona ytōko sytatose. Kapu ae Ayhtohpyry ase. Yrome Ritonōpo maro oturuketō tuisary tō jewokāko mana. Moeze omihpyry warōkō roropa jewokāko jorihmapotohme ahno a juteutōkara a. 34 Jeunohnōko mā toto, jetakurōko. Ypipohnōko roropa mā toto. Moromeīpo jorihmapōko mā toto rahkene. Yrome oseruao tōmehse jahtao ēsemānōko ropa ase, tykase Jezu eya xine.

Tiaku tō nekaropotopōpyry Joāo maro

(Mat 20.20-28)

35 Morarame Tiaku tō toytose Jezu a Joāo maro, oturupose. Ynara tykase toto eya,

—Tamuxi, ynaporotyry se pyra hma opūtokoxi? tykase toto eya.

36 —Oty katohme? tykase Jezu eya xine.

37 —Arypyra, ynaporotyry se ynanase opūtokoxi tuisa konōtome toehse awahtao, toiro āpotunuru wino, toiro opoozery wino, ākorehmaneme yna ehtohme, tykase toh repe eya.

38 Yrome ynara tykase Jezu eya xine,

—Ōtururukō waro pyra matose. Oetuarimarykō se hmatou ysahmo? Orikyrykō se roropa hmatou ymahro? tykase ynororo eya xine.

39 —Ise ynanase, tykase toto eya. Yrome ynara tykase Jezu eya xine,

—Ypokoino etuarimāko matose. Orihnōko roropa matose. 40 Yrome ywy tuisame oripyra xine ase. Ywy kara ase oporohkapotorŷko ymyhtokoxi. Ritonōpo nymenekahpyry rokē mā porohnōko ymyhtokoxi, tykase Jezu eya xine.

41 Morara kary etaryke tyya xine imehnō mokaro zehno toehse Jezu poetory tomo, 10mākomo. 42

Morarame typoetory tō tykohmase tyya tōturutohme toto a. Ynara tykase ynororo eya xine,

—Ahno waro matose. Ahno tuisame ahtao imehnō rohmanohpōko rokē mana. Tuisame exiryke tynamotoke toto. 43 Yrome amarokō tyoro. Imehxo oexirykō se awahtao xine imehnō akorehmatoko.

44 Tuisame oexirykō se awahtao xine, imehnō namotome ehtoko. 45 Kapu ae Ayhtohpyry ase. Imehnō

namotomase pyra aepyhpyry ase. Emero rokē akorehmatōme aepyhpyry ase. Orihse roropa oepyase

emero pohnō kurākatohme roropa, tykase ynororo eya xine.

Patimeu kurākatopōpyry ropa poko Jezu a, tonurēkara

(Mat 20.29-34; Ruk 18.35-43)

46 Morarame Jeriko pona toytose toto. Morotoino pata poe toytose ropa toto, typoetory tō maro,

tuhkākō maro. Moroto tonurēkara kynexine Patimeu, Timeu mūkuru. Typorohse ynororo osema ehpiu tineru eraximase. 47 Morarame Jezu Nazarepō oepyry ekary totase tyya ahtao tykohmase eya.

—Jezu, Tawi parýpyry, ypyno myhë exiko, tykase ynororo opore.
 48 —Mynyhme exiko, tykase toto eya imoihmākomo. Yrome tykohmase oporehxo ynororo.
 —Tawi parýpyry, ypyno myhë exiko, tykase ropa ynororo opore.
 49 Morarame Jezu totypohse osema tao.
 —Moky enehpoko xiaro, tykase ynororo eya xine. Mame tonurēkara tykohmase eya xine,
 —Enaromyra exiko. Owōko. Jezu oya kynako, tykase toto eya.
 50 Mame tupō xihpyry tomase eya. Towōse ynororo. Jezu a toytose.
 51 —Oty se hma ya, tykase Jezu eya.
 —Ritonōpo mūkuru nymyry mase. Josenuhmary se ropa ase, tykase eya.
 52 Mame Jezu a tozuhse,
 —Ytoko. Tonetupuhse oya jexiryke okurākāko ropa ase.
 Axī tonure toehse ropa ynororo. Mame Jezu maro toytose ynororo osemae.

Jerusarē pona Jezu ytotoþopyry

(Mat 21.1-11; Ruk 19.28-40; Jo 12.12-19)

11

1 Morarame eporehkasasaka toh kynexine Jerusarē pona. Oriwera ākataka toeporehkase toto. Atameke pyra pata tō kynexine Pehpaje, Petania ppy Oriwera maro. Mame typoetory tō tonyohse Jezu a asakoro.
 2 —Mō pata pona ytoto. Morotona toeporehkase awahtao xine jumētu mūkuru enēko matose, tymyhse. Ahno anaropitopy enēko matose. Mýpokatatose enehtohme xiaro ya. 3 Mame, “Oty kahtohko arōko matou?” karyhtao imehno a, ynara kaxitoko eya xine. “Arypyra, arōko rokē ynanase. ‘Enehta aporo,’ tykase tuisa exiryke yna a. Axītao rokē arōko ynanase. Enehnōko ropa ynanase,” kahtoko eya xine, tykase Jezu typoetory tomo a.
 4 Morarame toytose toto. Jumētu mūkuru tonese eya xine rahkene, tapyi eutary pota tao, osema ehpio. Mame tymyhpokase eya xine ahtao,
 5 —Oty katoh jumētu mūkuru myhpokāko matou? tykase imehnō eya xine, tōturupose.
 6 Mame tosēkō omihpyry tokarose eya xine.
 —Ahtao arotoko, tykase toto eya xine. 7 Mame jumētu mūkuru tarose rahke eya xine Jezu a. Morarame tupōkō tyrise toto a jumētu mypatarānaka Jezu porohtohme epona. 8 Imoihmākomo a roropa tupōkō tyrise osema taka. Marariary panō tapukase roropa eya xine osemae tyritohme, eporo jumētu ytotohme.
 9 Mame emero tātākyemase toto, osemazuhme ytaketomo, okomino ytaketō roropa. Ynara tykase toto,
 —Kure Ritonōpo mana. Imehxo reh nahse Ritonōpo omi poe aepyhpyry. 10 Kuesēkōme exiko mana, tuisa konōtome, pake tuisame Tawi ehtopyry samo. Ahtao kure rahkene. Kure Ritonōpo, imehxo! tykase toto tākye toexirykōke.
 11 Morarame Jerusarē pona toeporehkase toto. Ritonōpo maro oturutoh taka axi rokē tomōse Jezu osenuhmase rokene. Tykohmāse exiryke toytose ropa ynororo Petania pona typoetory tō maro, 12mākō maro.

Eperý zoko orihmapotopyry Jezu a

(Mat 21.18-19)

12 Yro kokoro Petania poe toytory ropahatao omise Jezu kynexine. 13 Amekeino tykyrysā tonese eya. Wikeira tonese atarykara ro. Mame toytose ynororo wikeira eperý enahse repe. Yrome toperere pyra kynexine zary rokene, takehse exiryke.
 14 —Taroino oeperý onenahpyra exiko exino mana, jūme, tykase Jezu tykyrysamo a.
 Morara kary totase ipoetory tomo a.

Ritonōpo maro oturutoh taka Jezu ytotopōpyry

(Mat 21.12-17; Ruk 19.45-48; Jo 2.13-22)

15 Morarame Jerusarē pona toeporehkase rahkene. Ritonōpo maro oturutoh taka tomōse Jezu. Moro tae osepekahketō tūtitanohpose ropa eya okyno ekamonanō maro. Tineru emetakamananō meza tōtorimase roropa eya. Parutopuruimo ekamonanō apō tōtorimapose roropa eya. 16 Otyro anaropopyra Ritonōpo maro oturutoh takuroko kynexine ynororo.

17 Morarame tamorepase toto eya. Ynara tykase ynororo,

—Ynara tymerose Ritonōpo omiryne, “Emero ahno ytapyī esehtōko Ritonōpo maro oturutohme,” me tymerose. Yrome ityorōmāko matose omato kō tapyīme ehtohme, tykase Jezu eya xine.

18 Morarame Jezu otururu totase Ritonōpo maro oturuketō tuisary tomo a, Moeze omihpyry warōkō maro. Jezu etapary se toehse toto zumoxike toexirykōke, emero Jezu poko imehnō atākyemary eneryke tyya xine.

19 Mame tykohmāse ahtao typoetory maro Jezu toytose ropa pata poe.

Epery zoko orihmapotopōpyry enetupuhtopōpyry

(Mat 21.20-22)

20 Morarame yrokokoro pakeimo toytorykohtao ynara katopōpyry Jezu a tonese eya xine, “Oepery onenahpyra exīko exino mana jūme” katopōpyry tonese eya xine. 21 Pake toorihse tonese eya xine. Mame wenikehpyra Peturu kynexine moro katopōpyry poko eya.

—Jezu eneko ke! Moro anaorihmapohpyry pake toorihse, tykase Peturu eya.

22 Mame ynara tykase Jezu eya xine,

—Wenikehpyra ehtoko. Ritonōpo enetuputyryhtao oya xine, 23 mo ypy aroporyhtao oya xine tuna konōto kuaka aepukatohme, “Epukāko hna reh,” kara ehtoko okurohtao xine. Mame tuna konōto kuaka Ritonōpo omi poe epukāko mana. Ritonōpo rokē enetupuhtoko okurohtao xine. 24 Morara exiryke ynara āko ase oya xine, Ritonōpo maro otururukohtao ōpenerykō poko, inekarory enetupuhtoko. Mame ōpenerykō ekarōko oya xine mana. 25 Mame otururukohtao Ritonōpo a imehnō zehno pyra ehtoko. Zae pyra toto ehtopōpyry poko tuenikaro rokē ehtoko, Omykō kapuaō ozehno xine pyra ehtohme roropa, oorypyrykō korokatohme roropa eya. 26 Māpyra imehnō rypyry poko tuenikaroro pyra awahtao xine, Omykō kapuaō roropa oorypyrykō onykorokara mana, tykase Jezu eya xine.

Onoky omi poe Jezu ehtopōpyry

(Mat 21.23-27; Ruk 20.1-8)

27 Morarame toeporehkase toto Jerusarē pona. Jezu ytoytoryhtao Ritonōpo maro oturutoh tao, morotōkō toytose eya oturuse, Ritonōpo maro oturuketō tuisary tomo, Moeze omihpyry warōkomo, juteu tō tamuximākomo, enara. Ynara tykase toto eya,

28 —Onoky omi poe senohne rīko mah? Onokyh, “Ikyryko,” nykā oya? tykase toto Jezu a.

29 Mame Jezu a tozuhse toto,

—Ywy roropa oturupōko ase oya xine. Zae jезukuruhtao oya xine senohne kyrypone ekarōko ase oya xine. 30 Kaxitoko kuezuhutoko. Onoky omi poe roropa ahno ēpurihkane João? Ritonōpo omi poe, ahno omi poe? tykase Jezu eya xine.

31 Mame tōturuse toto oxime rokene,

—“Ritonōpo omi poe ahno ēpurihkane João,” karyhtao kyya xine, ynara āko mā Jezu kuezuhutoryko, “Morara ahtao oty katohme João omiry onenetupuhpyra matou?” āko mā kyya xine. 32 Yrome, “Ahno rokē omi poe ahno ēpurihkane João,” karyhtao kyya xine imoihmākō kyzehno xine exīko mana, urutōme nymyry João Ritonōpo omi poe ekaroryke eya xine, tykase toto oxime rokene. 33 Morara exiryke Jezu tozuhse toto a,

—Kū, zuaro pyra reh ynanahse, tykase toto Jezu a.

—Morara ahtao roropa senohne kyrypone onekaropyra ase roropa, tykase Jezu eya xine.

Popyra mokaro tupito poko erohketō ehtopōpyry

(Mat 21.33-46; Ruk 20.9-19)

12

1 Morarame Ritonōpo namorepatoh poko tōturuse ropa ynororo. Ynara tykase ynororo,
—Imep̄y orutua a otyro tarykase eya, uwa tomo, tupito pona. Mame tapuruse tupito eya. Nono tahkase eya pēkame uwa euhkatoh ritohme tyya. Tapyi tamose roropa eya kaetoko, emero enetohme.

Morarame tutupi emero tokarose eya erohketomo a. 2 Mame toytose ynororo imep̄y pona. Moromeīpo uwa toehse ahtao typoetory taropose eya mokaro a, uwa epery apiakase, enehtohme tyya. 3 Mame inaropohpyry tapoise tupito poko erohketomo a. Typipohse ynororo eya xine. Tynaroke pyra taropose ropa eya xine. 4 Morarame imep̄y typoetory taropose ropa eya repe. Mame tuhtātāmase ropa tupito poko erohketomo a taosanumase itamurume eya xine. 5 Mame imep̄y inaropohpyry totapase roropa eya xine. Morararo tuhke inaropotyā tyhtomase eya xine ipoetory tomo. Totapase roropa tuhke inaropotyamo tupito poko erohketomo a. 6 Mame uwa esē poetory toiro rokē nae kynexine, imūkuru rokene, ipynu rokene. Morara ahtao ro tumūkuru taropose eya. “Otarāme mā toto kure umūkuru rīko, umūkurume exiryke,” tykase esē repe. Mame taropose tumūkuru. 7 Yrome mokyro eneryke tyya xine ynara tykase tupito poko erohketomo, “To! Uwa esē mūkuru mokyro tumy myakāme. Setapatone uwa esary kutupikōme ehtohme,” tykase toto oxime rokene.

8 —Imūkuru tapoise eya xine rahkene. Totapase eya xine. Ekepyry tomase tupito ehpikoxi eya xine.

9 —Naeroro otara āko uwa esē nae tumūkuru etapatopōpyry ekary totase tyya ahtao? Ytōko mā rahkene mokaro etapase. Mame imehnomo a uwa esary ekarōko mana, tykase Jezu totananomo a. 10

—Ritonōpo omiry onenepyra ro matou? Meneatose ro. Ynara tymerose eya,

“Tapyi rinanō nurumekahpyry, ‘Wewe popyra,’ karyke eya xine,

mororo tyrise ropa tapyi nikapuru apoihtyme,

kure exiryke tūpore, jamihme tapyi ehtohme.

11 Ritonōpo nyrihpyry moro. Kure mana.

Kyzamaro xine mana,”

me tymerose Ritonōpo omiry, tykase Jezu eya xine.

12 Morarame Jezu turutopōpyry typoko xine tonetupuhse toto a, uwa esary poko erohketō sā toexirykōke. Naeroro Jezu apoiry se toehse toto ēmatohme repe. Yrome tuhkākō zuno toexirykōke anapoipyra tokurehse toto.

Kowenu tinerū epehmary poko

(Mat 22.15-22; Ruk 20.20-26)

13 Morarame parixeu tō taropose Erote epe tō maro, Jezu omiry azahkuru etatohme ihxirotohme tyya xine repe. 14 Mame toytose toto Jezu a. Ynara tykase toto eya,

—Amorepatō mase. Awaro ynanase. Ajojhe pyra mase ipunaka. Imehnō zuno pyra roropa mase.

Tuisame ahtao, tuisame pyra ahtao, oxisā rokē mā toh oya. Zae Ritonōpo omiry poko amorepatō mase.

Yrome kure kowenu tinerū epehmary yna a? Kure onepehmara yna exiry? Oty kurehxo? tykase toto eya, tōturupose.

15 Yrome Jezu tuaro kynexine, ajoajohpe toto exiry waro.

—Oty katohme jenekunopyry se hmatou? Tineru puhturu enehta. Enexi aporo, tykase ynoro eya xine. #ni6

16 Toiro tonehse toto a. Morarame ynara tykase Jezu eya xine,

—Onoky ekuhtopōpyry mokyro ipoko? Onoky esety roropa ipoko? tykase ynororo eya xine.

—Kowenu tuisary mokyro, tykase toto.

17 Morarame ynara tykase Jezu eya xine,

—Morara ahtao kowenu kyryry ekarotoko ropa kowenu tuisary a. Morararo Ritonõpo kyryry ekarotoko Ritonõpo a, tykase Jezu eya xine.

Morarame toepohnohse toto Jezu otururu etaryke tyya xine.

Aorihtyã eşemãkapory ropa poko

(Mat 22.23-33; Ruk 20.27-40)

18 Morarame satuseu tõ toytose Jezu a. (Mokaro ynara kananõ kynexine, “Toorihse kuahtao xine jüme eşemãpyra ropa sytatoše,” kananõ kynexine.) Mame Jezu a ynara tykase toto,

19 —Amorepatõme mase. Etako pahne, Moeze nymerohpyry ynara äko, “Orutua toorihse ahtao tumükue pyra ro ahtao, kure ipytÿpyry maro zakoronÿpyry a erënanopyry aemükuatohme aorikyhyry mükurume samo,” me tymerose Moeze a. 20 Ynara kynexine orutua komo. 7me kynexine.

Esemazupurukõ torënase nohpo maro. Yrome emükuara ro tahtao toorihse ynororo. 21 Okomino zakoronÿpyry ikaponato imaro torënase, turui pytÿpyry maro. Yrome morararo emükuara ro tahtao toorihse roropa ynororo. 22 Mame ikaponato mokyro ro saaro toorihse. Morara rokë emükuara tokurehse toto. Mame porehme toorihse toto emükuara ro tahtao xine. Etyhpyrykõme nohpo roropa toorihse. 23 Imeïpo aorihtyã eşemamyry ropahätao, onoky pytyme na nohpo exiko? 7me imaro torënase exiryke, tykase, tõturupose toto Jezu a.

24 Morarame Jezu a tozuhse toto,

—Azahkuru matose, Ritonõpo omiry waro pyra oexirykõke, ijamitunuru waro pyra roropa oexirykõke.

25 Aorihtyã tõ eşemãkary ropahätao pytara exino mana, niotara roropa nohpo tomo, enara. Ritonõpo nenyohÿtä sä rokë exiko mä exino. 26 Aorihtyã eşemamyry ropa poko Moeze omihpyry onenepitopyra ro hmatou? tykase Jezu eya xine. —Moeze a Ritonõpo tõturuse pika myhto. Ynara tykase ynororo, “Aparão esëme ase, Aparão te, Izake te, Jako te, enara ase toto esëme,” tykase Ritonõpo Moeze a aorihtyã poko. 27 “Aorihtyã esëme ase,” kara Ritonõpo kynexine Moeze a aëshemãtyã ropa esëme toexiryke. Azahkuru rokë matose, “Ahno eşemãpyra ropa mana,” karyhtao oya xine, tykase Jezu eya xine.

Zae ehtoh poko Ritonõpo omipona

(Mat 22.34-40; Ruk 10.25-28)

28 Morarame Moeze omihpyry warõ tooehse, mokaro oseosezukururu etase. Jezu a toto ezukururu kure etaryke tyya ynara tykase ynororo Jezu a,

—Ritonõpo poe Moeze nymerohpyry tuhke nae, aomipona kuehtohkõme. Morara exiryke oty riry kurehxo nae Ritonõpo a? tykase ynororo tõturupose Jezu a.

29 Ynara tykase Jezu eya,

—Ynara kure Ritonõpo a, “Etatoko pahne, Izyraeu tomo. Toiro rokë Ritonõpo nae. Ynoro rokë oesëkõme mana. 30 Morara exiryke ipyno ehtoko ipunaka. Oesëkõme tyritoko okurohtaka xine. Imehxo tyritoko õmirykõ ke. Kure rokë tyritoko õsenetupuhtokõ ae oorikyrykõ ponãmero.” 31 Ynara katoh roropa kure Ritonõpo a mana, “Osepyno oexirykõ sä imehnõ pyno ehtoko,” katoh kure roropa Ritonõpo a mana. Morara katoh asakoro kure Ritonõpo a mana, tykase Jezu eya xine.

32 Mame ynara tykase ynororo Jezu a,

—Zae amorepatõ mase. Ajohpe pyra mase. Toiro rokë Ritonõpo mana. Imepÿ pyra mana. 33 Ipyno kuexirykohtao ipunaka kure mana. Kuesëkõme tyryryhtao kyya xine kukurohtao xine, kure rokë Ritonõpo riryhtao kyya xine kuosenetupuhtokõke kuorikyrykõ ponãmero. Mame osepyno kuexirykõ sä imehnõ pyno kuahtao xine zae exiko sytatoše. Naeroro moro asakoro omipona kuexirykõ kure kuhse mana, kaneru zahkary motye, tykase ynororo Jezu a.

34 Azazahkuru pyra tozuhse eya Jezu. Morara exiryke ynara tykase Jezu eya,
—Ritonōpo enetupuhzasaka mase. Ipoetoryme exisasaka roropa mase, tykase Jezu eya.
Mame morara kary etaryke tyya xine, imehnō Jezu a tōturuporykō se pyra toehse toto.

Ritonōpo nymenekahpyry ehtoh poko

(Mat 22.41-46; Ruk 20.41-44)

35 Morarame toto amoreparihtao ro Ritonōpo maro oturutoh tao ynara tykase Jezu eya xine,
—Oty katohme Moeze omihpyry warōkō ynara āko Ritonōpo nymenekahpyry poko nae, “Tawi parỹpyry mokyro,” āko? Yrome Ritonōpo nymenekahpyryme ynororo. Naeroro otātohxō Tawi parỹpyryme nah? 36 Ynara tykase Tawi Ritonōpo zuzenu omi poe,
“Ritonōpo tōturuse jesē maro,
‘Oporohko seino japotunuru wino.
Ozehno exiketō riko ase opoetory tōme,’ tykase Ritonōpo,”
me tymerose Tawi a pake Ritonōpo omiryryme. 37 Tosēme tosehtose ahtao Tawi a, otāto iparỹpyryme nah? tykase Jezu eya xine tōturupose.

Osenekunohpyry ehtoko zae pyra amorepatōkomo a

(Mat 23.1-36; Ruk 20.45-47)

Mame tākye toehse toto imoihmākomo morara kary etaryke tyya xine. 38 Morarame ynara tykase Jezu imoihmākomo a,
—Tomeseke ehtoko Moeze omihpyry warōkō poko. Upo kurā ke otupohtōko mā toto, ynara kary etatohme imehnomō a, “Moejno amorepatono,” kary etatohme imehnomō a osepekahtoh tao. 39 Epehtoh kurā se rokē toto tapōkōme Ritonōpo maro oturutoh tao. Tuisa apō se roropa mā toto tapōkōme otuhtoh konōto ahtao. 40 Morarame pytỹpo tō enekunohnōko mā toto. Ematonanohnōko roropa mā toto. Moromeīpo oturūko sā mā toto Ritonōpo maro yronomyryme, imehnō enekunohtohme tyya xine. Itamurumehxo toto wānohnōko Ritonōpo mana, tykase ynororo eya xine.

Pytỹpo nekarohpyry

(Ruk 21.1-4)

41 Morarame Jezu typorohse tineru ē etonie tineru ēmary enetohme tyya, imehnomō a tineru ē aka, Ritonōpo tinerūme. Tuhke tymōkomokamo a tytinerūkō tōmase repe pitiko rokē pyra. 42 Mame okomino pytỹpo a tytinerū tōmase roropa. Tymōkomokēkara kynexine. Tineru puhturu rokē tōmase eya ē aka, asakoro rokene. 43 Moro eneryke tyya typoetory tō tykohmase Jezu a. Ynara tykase ynororo,
—Moky hkoh pytỹpo enetoko. Ajohpe pyra imehnō nekarohpyry motye tineru tokarose eya Ritonōpo a. 44 Mokaro a zokonaka rokē tytinerūkō tokarose. Yrome mose nohpo a emero tytinerū tokarose, tykase Jezu eya xine.

Jezu oturutopỹpyry Ritonōpo maro oturutoh kararahthoh poko

(Mat 24.1-2; Ruk 21.5-6)

13

1 Morarame Ritonōpo maro oturutoh tae tutūtase ropa tahtao xine, tapyi tō tonepose ipoetory a topu risemy,

—Tamuxi eneko ke, tapyi pohtomo, topu kurā ke rokē tyrise, tykase ynororo eya. Yrome ynara tykase Jezu eya,

2 —Tapyi kure mā repe. Yrome tā pixo rokē mana etohtohkāko mana emero, tykase Jezu eya xine.

Etuarimatoh poko, ooryhmarykō poko roropa

(Mat 24.3-14; Ruk 21.7-19)

3 Morarame ypy pona Jezu tōnuhse, Oriwera pona. Typorohse ynororo moroto ypy po. Ritonōpo maro oturutoh enēko kynexine. Mame Peturu tō toytose eya oturupose, Peturu, Tiaku, João, Ātare, enara.

Ynara tykase toto Jezu a,

4 —Otara ahtao hkoh senohne etohtohkāko nae? tykase ynaroro tapyi tō poko. —Yna zuruko aetohtohkary poko. Otara ahtao aetohtohkary enepitōko ynanah? tykase toto Jezu a tōturupose.

5 Morarame Jezu a tozuhse toto,

—Tomese ke ehtoko oenekunohpyra xine imehnō ehtohme. 6 Tuhke oehnōko jesetyae osesehtoketō mana. “Kyrixtu ase, Ritonōpo nymenekahpyry,” āko toh mā repe. Tuhkākō enekunohnōko toh mana. 7 Mame oxiehnokō osetapary etāko matose. Mokaro ekary etaryhtao torētyke pyra ehtoko sero nono enahkary poko. Morara exīko mā repe. Yrome nono onenahkapopyra ro Ritonōpo mana. 8 Mame ahno tō osetapāko mā toto. Pata konōtopōkō roropa imehnō etapāko mana. Mame nono kywyhkywyh āko roropa mana tuhke pata tamuru punero. Tōsē penery rohnōko roropa mā toto. Morara toehse ahtao etuarimapitōko exino mana poeto ē enurupitory samo.

9 —Naeroro tomeseke ehtoko. Aarotorỹko imehnō mana terekatu ēpataka. Opihohtorỹko roropa imehnō mana wewe ke atamorepatoh tao. Kowenu ēpataka aarotorỹko roropa toh mana, tuisa konōto ēpataka roropa, ypokoino. Mame moroto awahtao xine zurutoko toto Ritonōpo omiry kurā poko zuaro toto ehtohme. 10 Emero pata tamuru po toto zurūko matose jomiry poko. (Mame tosēkōme jenetuputyryhtao eya xine, tyrypyrykō rumekaryhtao roropa eya xine Ritonōpo poetoryme exīko toh mana.) 11 Morarame terekatu a tarose awahtao xine oēmapotohkōme, torētyke pyra ehtoko. “Otara āko hano,” kara ehtoko. Moroto awahtao xine Ritonōpo zuzenu nekarohpyry rokē ekarotoko morotōkomo a. Āmoreme xine pyra oturūko matose, Ritonōpo zuzenu poe. 12 Morarame orutua kō takorō tō ewokāko toh mana ekarotohme terekatu tomo a, aorihmapotohme. Imehnō tumūkuru ewokāko roropa mā toto. Imehnō roropa tumykō zehno exīko. Aorihmapōko roropa mā toto. 13 Mame emero porehme ozehno xine exīko mā toto ypoetoryme oexirykōke. Yrome oryhmatopōpyrykō anahtoryhtao oya xine, jurumekara roropa awahtao xine oorikyrykō ponāmero opynanohtorỹko ase.

Ahno nyrihpyry xihpyry

(Mat 24.15-28; Ruk 21.20-24)

14 —Mame Tanieu Ritonōpo omi poe urutōme kynexine pake. (Morara exiryke inymerohpyry enetoko kure enetupuhtohme oya xine.) Ynara āko Tanieu nymerohpyry, “Ahno nyrihpyry xihpyry eneryhtao oya xine kohrame, Ritonōpo maro oturutoh tao tuarōtāko matose,” āko Tanieu nymerohpyry. Morara toehse ahtao ah Juteapōkō nepā toto ypy tō pona, orihpyra toehtohkōme. 15 Zara tao awahtao xine, epatoko omōkomorykō poko pyra. 16 Tupito po awahtao xine, ytopyra ropa ehtoko oupōkō pokona. Topohme rokē mepatatose. 17 Amarokō roropa nohpo tomo, poetoēme awahtao xine myhene. Etuarimāko matose oeparykohtao poeto pitiko enurusenā maro. 18 Oturutoko Ritonōpo a morara exipyra ehtohme ikonoporyae popyra exiryke ipunaka. 19 Morara toehse ahtao tōsē penery rohnōko mā toto, tyrohsē zetunuru rohnōko roropa mā toto. Moro panō onenepitopyra sytatose, moinoro nono ritopōpyry poe Ritonōpo a. Moromeīpo moro panō onenezomopyra sytatose exīko. 20 Tuhke pyra ěmepyyry morara tyriko Ritonōpo mana. Ritonōpo hnao emero enatry. Yrome tynymenekatyā pokoino tuhke pyra emehkapōko mā Ritonōpo.

21 —Morarame oururukohtao imehno a, “Enetoko ke. Ritonōpo nymenekahpyry mokyro,” āko toh mā repe oya xine. 22 Morara exiryke osenekunohpopyra ehtoko. “Ritonōpo nymenekahpyry ase,” kananō mā oehnōko, osesehtoketomo, ajohpākomo. Kurākara anỹpōko ropa toh mā repe. Pyaxime roropa toh mā repe. Ypoenohnōko mā toh repe. Imehnō enekunopyry se mā toh repe. Ypoetory tō enekunopyry se roropa mā toto. 23 Morara exiryke jomiry etatoko tuaro oehtohkōme,

osenekunohpopyra oehthkōme, tykase Jezu eya xine.

Kapu ae Ayhtohpyry oepiry ropa

(Mat 24.29-31; Ruk 21.25-28)

24 —Morara toehkehse ahtao xixi ezehnōko mana. Nuno osenepyra exīko. 25 Xirikuato tō epukāko kapu poe kapu kywyhkywyh karyke, kapu esā esyryhmaryke. 26 Morarame emero porehme jenēko mā toto, Kapu ae Ayhtohpyryme jexiryke. Akuru ae jyhtory enēko. Saerehkane sā jenēko toh mana. Jamihme mā jyhtory exīko. 27 Mame Ritonōpo namoto tō enyohnōko ase ynymenekatyā enehtohme emero pata tō poe, moino nono etyhpyry poe, kapu etyhpyry poe roropa, enara.

Wasasa poko jeimamyry enetuputyry sā joeptyry ropa enetuputyry

(Mat 24.32-35; Ruk 21.29-33)

28 —Mame wasasa tōkehko waro matose. Toto etaryhtao jeimamyry enetupuhnōko matose. 29 Moro saaro ourutopōpyrykō poko ya tuaro ehtoko. “Oehsasaka ropa mana,” kaxitoko ypoko. Axī oehnōko ropa ase, tykase Jezu eya xine. 30 —Etatoko pahne, ynekarohpyry oya xine emero osenēko mana. Mame morohne enenanō toitoine orihpyra exīko toh mana joeptyry ropa ponāmero. 31 Kapu enahnōko mana. Sero nono roropa enahnōko mā repe. Yrome jomiry jūme enahpyme exīko mana, tykase Jezu.

Otāto ahtao? Zuaro pyra seropōkō mana

(Mat 24.36-44)

32 —Joeptyry ropa waro pyra matose. Ritonōpo nenyohityā zuaro pyra roropa mana. Ywy roropa zuaro pyra ase. Papa rokē zuaro mana. 33 Tuaro sā rokē ehtoko. Kueraximatoko, joeptyry ropa waro pyra oexirykōke, tykase Jezu eya xine. 34 —Tapyi esē samo. Mame toytoryhtao tytapyī tae typoetory rīko tytapyī eraseme mana, erohketō rohmanohpotohme. Toiro tapyi eutary erase rīko roropa mana tooepyry ropa eraximatohme eya. 35 Mokaro sā rokē weraximatoko joeptyry ropa waro pyra oexirykōke. Otarāme ikohmamyryme oehnōko ropa ase. Otarāme onoa. Otarāme kuratiri etaryhtao. Otarāme pakeimo. 36 Tokare pyra joeptyry ropa mana. Jeraximara awahtao xine ehxirōko matose joeptyry ropahntao. 37 Ourutopōpyrykō ya ekarōko roropa ase imehnomo a. Joeptyry ropa imomohtoko, tykase Jezu eya xine.

Tātamorepase toto Jezu apoiry poko

(Mat 26.1-5; Ruk 22.1-2; Jo 11.45-53)

14

1 Morarame asakoro ěmepyry se ro kynexine Paxikoa ritohme otuhtoh konōto, wyi pipahmā ritohme roropa. Moroto Jezu apoiry se toh kynexine Ritonōpo maro oturuketō tuisary tomo, Moeze omihpyry warōkomo, enara. Omatome apoiry se toh kynexine repe, etapatohme repe. 2 Ynara tykase toto oxime, —Otuhtohntao Jezu anapoipyra sehtone ahno tuhke exiryke. Otarāme kyzehno xine exīko toh mana, tykase toto.

Jezu ehtopōpyry poko Petania po

(Mat 26.6-13; Jo 12.1-8)

3 Morarame Petania po Jezu kynexine Ximāo tapyī tao. Ximāo mokyro ipū imotahpyrypyry. Meza po otuhnōko toh kynexine. Mame nohpo a ixtaratu tonehse Jezu a topu kurā risē ao, arapaxturu risē ao. Ixtaratu esety naatu. Mame ixtaratu ē tuhkohse eya Jezu zūsety popatohme. 4 Morarame enenanō oseya rokē tōturuse toto, ixtaratu poko zumoxike toexirykōke, —Oty katohme mose ixtaratu ahnikāko rokē nae? 5 Tokamosēme ahtao, tuhke tineru atapoiry

tymōkomokākara a ekarotohme, tykase toto. Nohpo tykerekemase eya xine.

6 Yrome Jezu a tozuhse,

—Oty katoh mose kerekemāko matou ixtaratu pokoino? Inykyryhpyry kure ya. 7 Tymōkomokākara mā enahpyra amaro xine. Mokā akorehmary se awahtao xine akorehmatoko toto. Yrome ywy okynā pyra ase amaro xine. 8 Ixtaratu nae toexiryke, jūsety popano tamoreme. Joko popano orihpyra ro jexiryke, toorihse jahtao joko zonētohme. 9 Etatoko pahne, emero pata tō poro jomiry poko imehnō amoreparyhtao oya xine mose nyrihpyry poko roropa oturūko matose. Mame oesahpyo xine roropa mose poko oturūko imehnō mana wenikehpyra ehtohme jūme inyrihpyry poko, tykase Jezu eya xine.

Jezu ewokary se Juta ehtopōpyry poko

(Mat 26.14-16; Ruk 22.3-6)

10 Morarame Juta Ixikariote Jezu poetoryme kynexine repe. Mame toytose ynororo Ritonōpo maro oturuketō tuisary tomo a Jezu ewokase. 11 Mame aomiry etaryke tyya xine tākye toehse toto.

—Oepehmāko reh ynanahse, tykase toto Juta a. Naeroro toytose ropa ynororo. Tātamorepase itamurume Jezu ewokatoh poko tyya.

Paxikoe otuhtopōpyry Jezu a typoetory tō maro

(Mat 26.17-25; Ruk 22.7-14,21-23; Jo 13.21-30)

12 Morotoino wyi pipahmā ohpitotoh ae, kaneru mūkuru wotoh ae roropa Paxikoe tōsēme, tōturupose Jezu a ipoetory tomo,

—Aza ytōko ynana tōsē etapase? tykase toto.

13 Mame typoetory tō tonyohse Jezu a asakoro,

—Ytotoko pata pona. Moroto orutua enēko matose, tuna puimane enēko. 14 Mekahmatatose kene.

Mame tapyi taka aomomyryhtao ynara kahtoko tapyi esemy a, “Otoko amorepato esary nahe Paxikoe autuhtohpo, typoetory mahro?” kahtoko eya. 15 Mame tapyi tyarake enepōko mā oya xine. Emero nae exikety, meza te, epehtopo, apoto esary roropa, enara exikety. Moro tao tōsē ikyrytoko kuotuhtohkōme, tykase Jezu eya xine.

16 Morarame toytose toh rahkene pata pona. Mame tonese rahkene eya xine Jezu oturutopōpyamo.

Morarame tōsē tykyryse eya xine rahkene.

17 Morarame kokonie pukuro Jezu toytose rahkene otuhse typoetory tō maro. 18 Toto otukuruhtao ro Jezu a turuse toto,

—Etatoko pahne, taro ypoetory toiro jewokāko mana, ymaro otuhkety, tykase ynororo.

19 Mame tākye pyra ipoetory tō toehse morara kary etaryke tyya xine.

—Onoky? Ywy? tykase toto tōturupose atatakomino. Mame tozuhse toto Jezu a,

20 —Arypyra. Toiro mana, wyihpāko paratu aka ymaro, tykase ynororo eya xine. 21 —Kapu ae Ayhtohpyry ase. Ritonōpo nekarotopōpyryae ro orihnōko ase. Yrome etuarimāko mā jewokahpono, irohnōko. Enurupyra ahtao kurehxo eya exiry, etuarimara exiry, tykase Jezu eya xine.

Otuhtoh moro Jezu orihtopōpyry poko wenikehpyra ehtohme

(Mat 26.26-30; Ruk 22.15-20; 1 Kor 11.23-25)

22 Morarame tōtukuruhtao ro wyi tapoise Jezu a. Mame Ritonōpo a ynara tykase ynororo,

—Yna zuru seny onekarohpyry yna a. Kure mase Papa Ritonōpo, tykase ynororo. Mame morara kaxīpo tyya wyi tytohtohkase eya typoetory punero ekarotohme.

—Apoitoko, upū sero, tykase ynororo eya xine.

23 Morararo eukuru tapoise eya. Mame tōturuse ropa Ritonōpo a,

—Uwa eukuru onekarohpyry seny. Kure mase Papa Ritonōpo, tykase. Morarame eukuru ekarone typoetory tō punero. Tōse toto a emero.

24 —Umunuru seny. Umunuru kuānōko ase tuhke iirypyrymākō kurākatohme. Umunuru ekuamyryhtao tuhkākō Ritonōpo poetoryme exīko mana. 25 Etatoko pahne, uwa eukuru onēpyra ropa wwy, orihpyra ro jahtao. Tyoro ēnōko ase, euhkasenano, Ritonōpo esao rokene, tykase Jezu eya xine. 26 Morarame Ritonōpo omiryae toremiase toto. Morarame eremiakexīpo toytose toto pyy pona, Oriwera pona.

Peturu zurutopōpyry Jezu a

(Mat 26.31-35; Ruk 22.31-34; Jo 13.36-38)

27 Mame ynara tykase Jezu eya xine,

—Urumekāko matose emero, ynara tymerose exiryke Ritonōpo omiryae, “Esēkō etapāko ase. Mame ekypyā atahpahnōko mana,” me tymerose. 28 Yrome tōsemāse ropa jahtao ytōko ase osemazuhme Karirea pona, awapo xine. Moroto jenēko ropa matose, tykase eya xine Jezu.

29 Mame Peturu a tozuhse,

—Emero orumekāko toh mā repe, yrome wwy orumekara ase, tykase Peturu eya.

30 Mame Jezu a tozuhse ynororo,

—Etako pahne, sero kohmamyryae kuratiri etara ro asakoro ahtao poremānōko mase. Oseruao mase, “Jezu waro pyra ase,” āko mase. 31 Mame opore Peturu a tozuhse,

—Jorikyry ponāmero orumekara ase, tykase ynororo Jezu a.

Morara tykase imehnō Jezu poetory tō roropa emero.

Jezu oturutopōpyry Tummy maro Ketysemane po

(Mat 26.36-46; Ruk 22.39-46)

32 Morarame toeporehkase toto Ketysemane pona.

—Oporohtoko taro. Ytōko ase aporo Papa maro oturuse, tykase Jezu typoetory tomo a.

33 Morarame Peturu tō rokē tarose eya, Peturu, Tiaku, João, enara rokene. Morarame tomuhtapāse ynororo toemynyhmaryke yronymyryme.

34 —Samū āko ase itamuraume, jorikyry ponāmero tykase ynororo. —Morara exiryke taro ehtoko. Kueraximatoko, tykase Jezu tynarotyamo a.

35 Mame mya pitiko toytose ynororo porohse nono pona Tummy maro oturuse, etuarimara toehtohme.

36 —Papa Ritonōpo jamihme mase. Emero Ritō mase. Jorikyry se pyra ase repe. Yrome jorikyry se awahtao orihnōko ase. Ōmipona se rokē ase, tykase ynororo Tummy a.

37 Morarame toytose ropa Jezu typoetory tō tynyhse ahtao. Mame ynara tykase ynororo Ximāo Peturu a,

—Ximāo, nyhnōko mah? Toiro pixo eraximary se pyra hma ymahro? 38 Nyhpyra ehtoko. Oturutokohxo ty Ritonōpo maro oenekunohpyra xine joroko tamuru ehtohme. Onykyrykō se pyra matose repe. Yrome jamihme pyra matose.

39 Morarame myaro ropa toeramase Jezu oturuse ropa Ritonōpo maro, osemazuhme tōturutopōpyry saaro. 40 Morotoino typoetory a toytose ropa. Nyhnōko rokē toh kynexine tuetūkō jamitunurume pyra toexirykōke. Toehxirose toh kynexine. Morara exiryke onezuhpyra toh kynexine.

41 Morotoino oseruao toeramatoh toehse ahtao ynara tykase Jezu typoetory tomo a,

—Nyhnōko ro matou? Nyhpyra ehtoko imeīpo onyhtohkōme. Seromaroro jewokāko toh mana, yzehnotokomo. 42 Apakatoko! Ehmaropa! Jewokane enetokose. Mosero ro jewokāko mana, tykase Jezu typoetory tomo a.

Jezu apoitopōpyry juteu tomo a

(Mat 26.47-56; Ruk 22.47-53; Jo 18.3-12)

43 Morarame Jezu otururuhtao ro Juta toehse eya. 12me toto ehtoh mokyro kynexine ewokane. Imaro

toehse imehnō roropa tapema ke tomahpōke. Kaparu ke roropa tomahpōke toh kynexine. Ritonōpo maro oturuketō tuisary nenyohyā mokaro kynexine, Moeze omihpyry warōkō nenyohyā maro, juteu tō tuisary nenyohyā maro. 44 Mame eporehkara ro tahtao xine ynara tykase Jezu ewokary se exikety tymarōkomo a, “Etatoko pahne, Jezu maro rokē oturūko ase. Eahmāko sā ase. Iphohnōko ase. Moro eneryhtao oya xine enetupuhnōko matose. Jezu mokyro. Apoitoko,” tykase Juta eya xine.

45 Mame toehse ynororo topohme Jezu a.

—Tamuxi, taro hma? tykase eya. Mame toahmase. 46 Morarama Jezu tapoise eya xine. 47 Toiro Jezu marono a tytapemā tanŷse. Ritonōpo maro oturuketō tuisary namoto rokē tapurose. Typanasahkase rokene. 48 Morarama Jezu tōturuse eya xine,

—Omatome pyra ase. Oty katohme tykparuke moehtou japoise tytapemake roropa? 49 Kokoro rokē amorepato exiasene Ritonōpo maro oturutoh tao. Oty katoh moroto jahtao japoipyra mexiatose? Seromaroro rokē tokoh japoise mexitou Ritonōpo omihpyryae ro japoiko matose, tykase Jezu eya xine. 50 Mame Jezu turumekase ipoetory tomo a. Toepase toto. 51 Moroto nuasemā kynexine Jezu maro, tymetyke rokene. Mokyro apoiry se toehse toh repe. 52 Yrome toepase ynororo tymetyke pyra, enara.

Tamuxi tō ěpataka Jezu ehtopōpyry

(Mat 26.57-68; Ruk 22.54-55; Jo 18.13-14,19-24)

53 Morotoino Jezu tarose eya xine, Ritonōpo maro oturuketō tuisary tapyī taka. Moroto kynexine Ritonōpo maro oturuketō tuisary tomo, juteu tō tamuxiry tomo, Moeze omihpyry warōkomo, enara toh kynexine moroto oximōme.

54 Morarama Peturu toto mykapo toytose Ritonōpo maro oturuketō tuisary esaka. Jarakapyhpyry aka tomōse ynororo. Soutatu tō maro typorohse ynororo osūse apoto myhtokoxi. 55 Mame tapyī tao Jezu hxironanō zupiko toh kynexine Ritonōpo maro oturuketō tuisary tomo, Jezu orihmapory se toexirykōke. Yrome onenepyra tokurehse toto. 56 Tuhkākomo a tyhxirose repe, yrome tōsezusezuhse rokē toto.

57 Morarama orutua kō xikihme toehse Jezu hxirotohme repe. Ynara tykase toto,

58 —Ynara nase mose ynanetaryme, “Ritonōpo maro oturutoh seny, ahno nyrihpyry. Ikararahnōko ase. Mame oseruao rokē tōmehse ahtao imyakā riko ase, ahno nyriy sā pyra, nyriyyme ro,” nase mose ynanetaryme, tykase toto.

59 Yrome tōsezusezuhse rokē toto.

60 Mame Ritonōpo maro oturuketō tuisary xikihme toehse toto rānaka. Ynara tykase ynororo Jezu a, —Moxiā onezuhpyra hma ohxiroryke toto a? tykase eya.

61 Yrome mynyhme rokē Jezu kynexine. Onezuhpyra kynekurehne. Mame ynara tykase ropa ynororo eya,

—Ritonōpo nymenekahpyry mahno? Imūkurume roropa mahno? tykase ynororo eya tōturupose.

62 Mame Jezu a tozuhse,

—Ywy ase. Moromeipo jenēko matose, typorohse jahtao tuisame Ritonōpo maro. Joepyry ropa enēko roropa matose akuru htoko, tykase Jezu eya.

63 Mame morara kary etaryke tyya tupō tyxihkase eya. Ynara tykase ynororo,

—Epo mana. Tyorō se pyra sytatose ihxironeme. 64 Mose metatou? Popyra nase. “Ritonōpo mūkuru ase,” nykano. Otara āko matou ipoko taroino? tykase ynororo tōturupose.

—Popyra nase, tykase toto. —Aorihmapoko hkoty, tykase toh emero.

65 Totatotakurose eya xine. Mame ěmyty tapuruse soutatu tomo a kamisa ke ipipohthme tyya xine. Moromeipo tōturupose toto,

—Onoky opipohno? Esehtoko, tykase toto Jezu a ipiipohxīpo tyya xine.

“Jezu waro pyra ase,” katopõpyry Peturu a

(Mat 26.69-75; Ruk 22.56-62; Jo 18.15-18,25-27)

66 Morarame jarao ro Peturu kynexine tapyi mykae osünõko. 67 Mame morotona toytose nohpo.

Ritonõpo maro oturuketõ tuisary namoto kynexine ynororo. Peturu eneryke tyya ausumyryhtao, ynara tykase ynororo,

—Omorororopa Jezu maro mexiase, Nazarepõ maro, tykase eya.

68 Yrome Peturu a tozuhse,

—Onoky? Ywy? Arypyra. Zuaro pyra ase. Otara äko mah? Onenetupuhpyra ase ipunaka, tykase Peturu eya.

Mame tutütase ropa Peturu tapyi eutary pota taka. Mame kuratiri totase eya. 69 Mame imepõ nohpo a tonese ropa. Imehnomo a ynara tykase ynororo,

—Mose roropa imarono, tykase.

70 —Ajohpe, tykase Peturu.

Moromeïpo imehnõ osenuhmaketõ töturupose Peturu a. Ynara tykase toto,

—Ajohpe pyra, omorororopa imarõ mexiase. Yna onenekunohpyra mase Karireapõme oexiryke, tykase toto eya.

71 Mame opore tozuhse Peturu a toto,

—Juānohnõko mā Ritonõpo ajohpe jahtao. Mokyro waro pyra sātāse, tykase ynororo eya xine.

72 Mame kuratiri totazomose ropa. Mame Jezu a turutopõpyry poko tutuarõtase ynororo. “Kuratiri etara ro asakoro ahtao, ‘Jezu waro pyra ase, Jezu waro pyra ase,’ äko mase oseruao,” katopõpyry poko tutuarõtase Peturu. Mame toehxirose ynororo yronomyryme. Tyxitase roropa ynororo.

Pirato ēpataka Jezu ehtopõpyry

(Mat 27.1-2,11-14; Ruk 23.1-5; Jo 18.28-38)

15

1 Morarame ēmepyrime tōximõse toto Ritonõpo maro oturuketõ tuisary tomo te, juteu tamuru tō maro te, Moeze omihpyry warõkõ maro, enara. Pata esã maro töturuse toto tynyrirykõ waro toehtohkõme.

Mame Jezu tymyhpose toto a, arotahme kowenu tuisary a, Pirato a. 2 Mame Pirato töturupose Jezu a, —Juteu tō tuisary hmahno? tykase ynororo eya.

—ÿ, ywy ase, tykase Jezu. 3 Mame Jezu tyhxirose tuhke Ritonõpo maro oturuketõ tuisary tomo a. 4 Naeroro Pirato töturuzomopose ropa eya,

—Oty katohtoto onezuhpyra mah ohxiroryke toto a? tykase eya Pirato.

5 Yrome onezuhzomopyra Jezu kynexine. Morara kaxiõpo tyya Pirato toemynyhmase tozuhzomopyra Jezu exiryke.

Jezu ekarotopõpyry aorihmapotohme

(Mat 27.15-26; Ruk 23.13-25; Jo 18.39-19.16)

6 Morarame āpuruhpyry tao tuhke ēmapotyã kynexine. Mame otuhtoh konõto ae toine emapotyã tütanohtose kowenu, jeimamyry punero, imoihmäkõ omi poe. 7 Kowenu zehno aehtyã roropa tōmapose kynexine āpuruhpyry taka, ahno etapahpõkomo. Toiro esety Parapa kynexine. 8 Imyhpokary poko oturuse tōximõse imoihmäkõ ahtao Pirato ēpataka, 9 ynara tykase Pirato eya xine, töturupose, —Juteu tō tuisary myhpokapory se hmatou ya? tykase ynororo eya xine. 10 Tuaro kynexine ynororo. Jezu tapoise Ritonõpo maro oturuketõ tuisary tomo a ekarotohme eya zumoxike toexirykõke. Moro waro Pirato kynexine.

11 Mame Ritonõpo maro oturuketõ tuisary omi poe Parapa tütanohtopy se toehse imoihmäkõ. 12 Morarame töturupose ropa Pirato eya xine,

—Otara mokyro juteu tō tuisary ripōko hano? tykase ynororo eya xine repe.

13 Opore tozuhse ynororo eya xine. Kui tykase toto,

—Wewe pokona exixihmapoko! tykase toto.

14 —Oty katohme? Azahkuru pyra mana. Iirypyryme pyra roropa mana, tykase Pirato eya xine.

Oporehxo tozuhse ynororo eya xine. Kui tykase rokē toto,

—Wewe pokona exixihmapoko! tykase toto.

15 Mame imoihmākō ākyemapory se Pirato exiryke, Parapa tutūtanohpose ropa eya. Mame Jezu typipohpose Pirato a. Moromeīpo tokarose ynororo soutatu tomo a aorihmapotohme.

Jezu eunohtopōpyry soutatu tomo a

(Mat 27.27-31; Jo 19.2-3)

16 Morarame Jezu tarose soutatu tomo a jarakapyhpyry aka, (kowenatu tapyī kurā taka). Moro taka roropa imehnō soutatu tō toahmase. Tuhke oximōme tohse toto. 17 Mame Jezu tupohose eya xine ezuezumā ke. Parimā sā tyrihpyry omoxino tyrise roropa eya xine Jezu zuhpokoxi. 18 Morarame taomikase eya xine.

—Moehno tamuxi. Juteu tō tuisaryme exikehpyra mase, tykase toto Jezu a. 19 Tymerehtātāmase toto a zupuhpyry pokona wewe pitiko ke. Ituh tykase toto Jezu pona. Mame ēpataka tosekumurukō po typorohse toto. Atahmākāko rokē toh kynexine. 20 Morotoino ihtomakehxīpo tupokase ropa eya xine. Ezuezumā touse ropa eya xine. Zupō ro tamurupose ropa eya xine. Morarame tarose rahkene eya xine wewe pokona exixihmatohme.

Exixihmatopōpyry wewe pokona

(Mat 27.32-44; Ruk 23.26-43; Jo 19.17-27)

21 Mame imepỹ tapoise eya xine, wewe arotohme eya, exixihmatoh arotohme. Mokyro esety Ximāo kynexine. Tupito poe pata pona ytōko kynexine repe. Xirenepō kynexine. Ipoenō Arexātere kynexine Rupo maro. Mame wewe tarose eya, Jezu exixihmatopo, soutatu tō naropohpyry. 22 Mame Jezu tarose eya Koukota pona. (Upuhpōpo esary, “Koukota,” kary.) 23 Morarame uwa epery ke Jezu tauhpase repe, toximase mira maro, karapa sā itūnety maro. Yrome onēpyra kynexine ynororo. 24 Mame wewe pokona toxixihmase rahkene. Mame zuponỹpyry tapiakase eya xine, tupōkōme. Topu pisarara tomase eya xine upo apoitohme tyya xine. 25 Xixi tōnuhsehxo ahtao Jezu toxixihmase wewe pokona eya xine. 26 Morarame ynara tymerose Jezu exixihmatoh pokona, “Juteu tō tuisary mosero,” katoh tymerose ipokona. 27 Morarame omato tō toxixihmase roropa Jezu maro, asakoro, apotunuru wino, ipoozery wino, enara. 28 (Pake Ritonōpo nymeropohpyryae ro Jezu poko, “Pohnō maro zuanohpōko toto,” katopōpyryae ro.)

29 Morarame tōsenuhnuhmase osemāe ytoketomo. Jezu tounohse eya xine. Ynara tykase toto,

—Ehē! Otara ahtao Ritonōpo maro oturutoh kararahnōko mah? Otara ahtao imyakāmāko ropa mah oseruao tōmehse ahtao? 30 Moro waro awahtao oenupunako roropa. Eropa, wewe poe oyhtoko ropa! tykase toto.

31 Mame Ritonōpo maro oturuketō tuisary a roropa Jezu tounohse, Moeze omihpyry warōkomo a roropa. Ynara tykase toto,

—Imehnō poko toenupunase ynororo repe. Oty katoh tōsepynanopyry waro pyra nae? 32 Ekuhko ke, oyhtoko ropa morotoino. Ritonōpo nymenekahpyryme awahtao oyhtoko ropa, juteu tō tuisaryme awahtao. Tyhtose ropa awahtao oenetupuhnōko ynanase, tykase toto eya.

Morarame imaro exixihmatyamo a roropa tounohse ynororo.

Jezu orihtopōpyry

(Mat 27.45-56; Ruk 23.44-49; Jo 19.28-30)

33 Morarame tãxiahtao tyarumãkapose Ritonõpo a pata tõ punero. Mame xixi tyhtosehxo ahtao tõmehse ropa. 34 Morarame opore Jezu tykohtase. Ynara tykase ynororo, —Eroi, Eroi, rema sapahtani, tykase. Tõmiryae morara kary ynara katopo, “Ritonõpo, Ritonõpo oty katohme kurumekano?” katopo.

35 Mame enenanõ ikui etaryke tyya xine, ynara tykase toto, —Etatoko ke! Eria kohmãko mana, tykase toto. 36 Mame imepõ axĩ tururume toytose mauru panõ zumyhkase ikatainety aka. Wewe pitiko pokona tyrise eya Jezu ohpatohme. —Seraximatone. Senetone. Otarãme Eria oehnõko mana mose ouse wewe poe, tykase toto, tõturuse.

37 Morarame Jezu kui tykazomose ahtao komih tykakehse. Toorihse rahkene.

38 Morara ahtao äpuruhyry toexihkase Ritonõpo maro oturutoh tao, kamisa risemy. Kaino toexihkase zuhkurenaka. 39 Morarame soutatu tõ esõ Jezu õpataka kynexine. Jezu a komihkakepyry eneryke tyya ynara tykase ynororo,

—Ajohpe pyra ro rukuh Ritonõpo mükurume nexiahse, tykase ynororo.

40 Morarame nohpo tõ moroto kynexine amekino rokõ enõko, Maria Matarena te, Sarome te, Maria Tiaku eny, enara toh kynexine. Tiaku, Joze, enara mokyro poenõ kynexine. 41 Mokaro a Jezu tokahmase akorehmase orihpyra ro ahtao, Karirea poro ahtao. Tuhke roropa nohpo tõ moroto kynexine, ytoketomo Jezu maro Jerusarõ pona.

Zonõtopõpyry

(Mat 27.57-61; Ruk 23.50-56; Jo 19.38-42)

42 Morarame kokonie pukuro otuhtoh riryhtao, oserematoh pyra ro ahtao roropa Joze a tunõkase Pirato. 43 Eya toytose Jezu ekepyry ekaropose. Joze Arimateapõ kynexine, imehnõ tuisaryme exikety kynexine. Ritonõpo omipona exikety roropa kynexine. 44 Mame Pirato a tozuhse,

—Ajohpe pyra rukuh norihno? tykase ynororo. Soutatu tõ esõ tonehpose tyya tõturupotohme Jezu orihõtopõpyry waro toehõtohme. 45 Mame turuse tahtao eya Jezu orihõtopõpyry waro toehse Pirato.

—Ekepyry arotoko, tykase ynororo Joze a. 46 Morarame kamisa karimutumã topekahse eya Jezu ekepyry zõtotohme. Touse ahtao wewe poe tyõtose eya topu eutary risõ aka tyritohme. Morarame topu parihmã ke okepy õ tapuruse eya. 47 Mame Jezu õmary tonese nohpo tomo a Maria Matarena a, Maria a roropa Joze eny. Enara toh kynexine enenanomo.

Õsemãtopõpyry ropa

(Mat 28.1-8; Ruk 24.1-12; Jo 20.1-10)

16

1 Morotoino oserematoh tõtyhkase ahtao ixtaratu topekahse toto a okepy popatohme, Maria Matarena a, Sarome a, Maria Tiaku eny a. Enara ixtaratu epekatyhpõkõ kynexine. 2 Pakeimo yrokokoro toytose toto okepy enese, xixi tütara ro ahtao. 3 Toytorykohtao tõturuse toto,

—Otarahxo koh topu syryhmãko sytano? tykase toto, (zumo topu exiryke).

4 Mame toeporehkase tahtao xine topu tisyryhmase tonese eya xine okepy apuru. 5 Mame okepy õ aka tomõse toto. Moro tao nuasemã tonese eya xine, typorohse tapotunuru wino, karimutumã ke tupoke.

6 Mame tõserehse toto. Mokyro a turuse nohpo tomo. Ynara tykase ynororo eya xine,

—Oserehyra ehtoko. Jezu zupõko matou, Nazarepono, exixihmahpyry? tykase mokyro eya xine. —

Nõsemãno ropa. Nowõno ropa. Taro aryppya mana, esahpyry rokõ taro mana. Enetoko pahne. 7 Morara exiryke ytotoko. Jezu poetory tõ zurutatoko. Peturu roropa kõ zurutoko. Jezu ytõko mana osemazuhme Karirea pona. Moroto eporyko matose inekarotopõpyryae ro, tykase mokyro nohpo tomo a.

8 Morarame tutütase ropa toto. Okepy esahpyry poe toepase toto. Tõmikehse toto enaromõke toexirykõke.

Aosenepotopōpyry ropa

(Mat 28.9-10; Jo 20.11-18)

9 Morarame pakeimo nomīkoae tōsemāse ropa tahtao Jezu kynosenepone ropa Maria Matarena a. Mokyro jorokohpanōpo kynexine. Pake Jezu a joroko tō tutūtanohpose ropa zae, 7me. 10 Mame toytose ynororo Jezu omihpyry ekarose ipoetory tomo a. Xitāko ro toh kynexine. 11 Mame ynara tykase ynororo eya xine,

—Jezu nēsemāno ropa! Eneo, tykase ynororo eya xine. Yrome,

—Ajohpe mase, tykase toto eya. Aomiry onenetupuhpyra toh kynexine.

Typoetory tomo a Jezu osenepotopōpyry, 2mākomo a

(Ruk 24.13-35)

12 Moromeīpo tōsenepose rahkene Jezu typoetory tomo a, 2mākomo a, osemāe toto ytoryhtao. Yrome onenetupuhpyra toh kynexine aporo. Tyorōme tokarose eya xine.

13 Morarame Jezu tonetupuhse tyya xine ahtao toytose ropa toto Jerusarē pona imehnō zuruse tynenehpyrykō poko. Yrome,

—Ajohpe matose, tykase toto, morotōkomo eya xine.

11mākomo a Jezu osenepotopōpyry

(Mat 28.16-20; Ruk 24.36-49; Jo 20.19-23; At 1.6-8)

14 Morotoino typoetory tomo a Jezu tōsenepose rahkene, 11mākomo a, toto otukuruhtao. Orēpyra tōturupose,

—Oty katohme axī jenetupuhpyra matou? Oty katoh, “Ajohpe rokene,” āko matou jēsemātopōpyry ropa poko? tykase Jezu eya xine.

15 Morarame typoetory tō taropose eya,

—Ytotoko emero pata tō punero. Jomiry ekarotatoko emero ahno a. 16 Jenetuputyryhtao eya xine tosēkōme Ritonōpo poetoryme exīko mā toto, tōpurihkase ahtao. Yrome jenetuputyry se pyra toto ahtao, Ritonōpo roropa toto se pyra exīko mana, apotoimo htaka rokē toto arōpōko mana. 17 Yrome jenetuputyryhtao toto jamihtanohpōko Ritonōpo mana. Joroko tō tūtanohpōko toto jesety poe. Imehnō omiry ae oturūko roropa mā toto. 18 Okoi tō apoiryhtao eya xine toto onesekara mana. Orihmatō enyryhtao eya xine orihpyra toh mana. Tomary ke kurākōkara apōko toto aekurākatohme ropa.

Jezu arotopōpyry kakoxi kapu aka

(Ruk 24.50-53; At 1.9-11)

19 Morarame tōturukehse tahtao Jezu tōnuhse rahkene kapu aka. Mame typorohse ynororo Ritonōpo apotunuru wino. 20 Morarame Jezu poetory tō toytose Ritonōpo omiry ekarose emero pata tō poro. Mame typoetory tō maro toerohse Jezu. Tyjamihtanohse toto eya tōmiry ekarotohme eya xine, kurākōkara kurākatohme roropa eya xine. Enara.